

**1:1** Di mulana i, madung adong Hata i. Rap dohot Debata do Hata i jana Debata do Hata i. **2** Mamungka sian mulana rap dohot Debata do Ia. **3** Sasudena do dijadihon markite-hite Ia, jana sian sasude na adong, sangkamata pe nada adong na nijadihon, so marhite sian Ia. **4** Mual ni ngolu do Hata i, \*MUAL NI NGOLU DO HATA I: Sanga,, sude na nitompa, mangolu dibagasan na sada dohot Hata i.\* jana ngolu i ma na mangalehen sinondang tu jolma. **5** Marsinondang do na torang i di hagolapan, jana nada tarintopi hagolapan i na torang i. **6** Ro ma halak na niutus ni Debata, si Johannes goarna. **7** Na manyaksihon taringot tu na torang i do na niharohonna, anso sudena halak porsaya. **8** Nada ia sandiri tutu na torang i, hum na manyaksihon do ia taringot tusi. **9** Torang na tutu na manorangi sandok jolma, ro tu portibi on. **10** Di portibi on do Hata i, markite-hite Ia do dijadihon portibi on, hape nada ditanda portibi on Ia. **11** Ro ma Ia tu luatNia sandiri, hape nada dijagit bangsoNia i Ia. **12** Tapi sanga ise na manjagit Ia jana porsaya tuSia, dilehen Ia do hak gabe dakdanak ni Debata, **13** i ma angka na so tubu sian mudar, sanga sian roha sibuk, sanga sian hagirot ni halaklahi, tapi na ditubuhon ni Debata. **14** Jadi madung gabe sibuk do Hata i, jana maringan di tonga-tonganta, madung taida hamuliaonNia. Songon hamuliaon ni Anak Sasada na sian Ama i, na gok asi ni roha dohot hasintongan. **15** Ro do si Johannes gabe saksina, dipaboa ia ma: "On ma da Ia na hudokkon i: Na giot ro do Ia umpudi sian au, tapi na gumodang ulang au, angke dompak so adong dope au, madung adong hian Ia." **16** Angke sian hagogokNia, nada mar na mantak Ia, mamasumasu tu hita sudena. **17** Dibaen dilehen do Tona i markite-hite si Musa tapi anggo asi ni roha dohot hasintongan markite-hite Jesus Kristus do. **18** Nada adong halak na unjung marnida Debata, asing sian Anak Sasada ni AmaNa, na diampuan ni Ama i, jana Ia do na papatarkonsa tu hita. **19** Jana on ma na disaksihon ni si Johannes hatiha na disuru ni halak Jahudi na sian Jerusalem angka malim dohot halak Levi laho manyapai ia, "Ise dehe ho?" **20** Nada pola ditabunihon si Johannes taringot tusi. Torus tangkas do dipaboa ia, "Nada au Kristus i." **21** "Anggo songon i, ise dehe ho satutuna?" ninna halahi manyapai. "Sanga si Elia dehe ho?" "Nada,"

ning si Johannes mangalusi. "Betak na ho do panurirang na indohan?"  
\*PANURIRANG NA INDOHAN: Ia ma na niarop ni roha na giot ro laho mambaritahon haroro ni Kristus i.\* ning halahi manyapai. "Nada," ning ia.  
**22** Dung i ninna halahi ma tusia, "Ise dehe ho?" Harana angkon adong do alus lehenonami tu angka na marsuru hami tuson. "Aha do dokkononmu taringot tu dirimu sandiri?" **23** Dialusi si Johannes ma dohot hata songon na nidok ni Panurirang Jesaya, "Anggo au, 'Sora ni halak na pio-pio di halongonan do au: Pahornop hamu ma dalan ni Tuhan!' " **24** Na nisuru ni halak Parise do angka na manyapai i. \*NA NISURU NI HALAK PARISE DO ANGKA NA MANYAPAI I: Sanga: Angka halak Parise do na nisuru i.\* **25** Disapai halahi ma tu si Johannes, "Anggo so ho do Kristus i, nada si Elia ho, nada panurirang na indohan muse ho, biasi dipandidihon ho halak?" **26** Dialusi si Johannes ma, "Dohot aek do hupandidihon halak. Tapi di tonga-tongamunu jongjong do Ia na so nitandamunu. **27** Umpudi dope Ia ro ulang au, tapi mangkarhari tali ni sipatuNia pe, nada tama dope au." **28** Di Betania na di ipar ni Batang aek Jordan do sudena i tarjadi, angke disi do si Johannes mandidihon halak. **29** Ancogotna i diida si Johannes ma ro Jesus mandapotkon ia. Didok si Johannes ma, "Ligi ma! Indi ma ibana Anak Ni Biri-biri Ni Debata na manyesa dosa ni portibi on! **30** Ia ma na hudokkon i na umpudi ro ulang au, tapi na gumodang dope Ia sian au; angke na dung adong hian do Ia dompak so sorang dope au. **31** Nada hutanda hian sanga na ise Ia, tapi hara ni i do umbaen na ro au mandidihon dohot aek anso ditanda halak Israel Ia." **32** Songon on ma hasaksian na nilehen ni si Johannes taringot tuSia, "Huida ma Tondi i mijur songon darapati sian langit lalu songgop tuSia. **33** Nada hutanda hian dope Ia. Tapi Debata na marsuru au mandidihon dohot aek i mandok tu au, 'Muda diida ho Tondi Parbadia mijur tu sada halak jana maringanan di bagasan Ia, Ia ma na giot mandidihon dohot Tondi Parbadia.' **34** Jadi madung tangkas huida Ia jana madung husaksihon, 'On ma Anak Ni Debata.'" **35** Ancogotna i laing jongjong ma disi si Johannes rap dohot siseannia dua halak. **36** Dung diida ia Jesus mamolus disi, ning ia ma, "Ligi ma, Anak Ni Biri-biri Ni Debata!" **37** Dibege sisean ni si Johannes sidua halak i do na nidok ni si Johannes songon i, gabe diihutkon halahi

ma Jesus. **38** Manaili ma Jesus tu pudi, jadi diida Ia ma halahi na mangihutkon Ia. Ninna Jesus ma, "Manjalahi aha dehe hamu?" Ninna halahi ma mangalusi, "Rabbi, di dia dehe Ho maringanan?" (Rabbi, astuanna 'Guru'.) **39** "Beta ma ligi hamu," ninna Jesus. Jadi udur ma halahi dohot Ia mangaligi sanga di dia Ia maringanan. Laing disi ma halahi dohot Ia na sadari i. (Hira-hira pukul opat andospotang ma hatiha i.) **40** Sahalak sian na dua i, i ma na umbege na nidok ni si Johannes jana na kehe udur dohot Jesus, i ma na margoar si Andreas, anggi ni si Simon Petrus. **41** Manigor diompoti si Andreas ma manjalahi si Simon angkangna i jana didok ia ma tu si Simon, "Madung marsuo hami dohot Mesias i!" (Mesias astuanna Kristus.) **42** Dung i ditaruhon si Andreas ma si Simon tu Jesus. Dipamanat Jesus ma si Simon, ning Ia ma, "Si Simon do ho, anak ni si Jona. Si Kepas noma goarmu." (Kepas disaro Ibrani dos dohot Petrus disaro Junani astuanna: dolok batu.) **43** Ancogotna i ditontuhon Jesus ma anso kehe Ia tu Galilea. Marsuo ma Ia dohot si Pilipus, dung i ning Ia ma tu si Pilipus, "Beta, ihutkon ma Au!" **44** (Sian Betsaida do asal ni si Pilipus, i ma kota ni si Andreas dohot si Petrus.) **45** Dung i marsuo muse ma si Pilipus dohot si Natanael jana didok ia ma, "Madung marsuo hami dohot Ia na nidok ni si Musa di bagasan Buku Tona i, dohot na nidok ni angka panurirang, i ma Jesus anak ni si Josep halak Nasaret i." **46** Tapi dialusi si Natanael ma, "Adong dehe lakna ro na denggan sian Nasaret?" "Beta ma taligi," ning si Pilipus mangalusi. **47** Diida Jesus do si Natanael ro mandapotkon Ia gabe dihatai Jesus ma taringot tu Sia. Ninna Jesus ma, "On ma halak Israel na tutu, na so adong lancap disia!" **48** "Sian dia diboto Ho taringot tu au?" ninna si Natanael manyapai Jesus. Dialusi Jesus ma, "Taran so dipio si Pilipus ho, dampak di toru ni bona ni hayu ara i dope ho, madung Huida ho." **49** Didok si Natanael ma, "Rabbi, Anak Ni Debata do Ho! Ho do Raja ni halak Israel!" **50** Dung i didok Jesus ma, "Adong he hara ni na Hudok i, madung Huida ho dampak di toru ni bona ni hayu ara i dope ho umbaen na porsaya ho? Idaonmu dope angka pangalaho na gumodang sian i!" **51** Dung i ninna Jesus ma tusia, "Tutu situtu do na Hudok on tu ho, idaonmu ma mungkap langit, jana manaek mijur ma angka surusuruan ni Debata tu Anak Ni Jolma i."

**2:1** Dung dua ari, adong ma pesta ni na marbagas di kota Kana na di Galilea. Ro do tusi inang ni Jesus, **2** jana diontang do Jesus rap dohot angka siseanNia tu pesta i. **3** Jadi dung abis sudena anggur, didok inang ni Jesus ma tuSia, "Madung abis anggur ni halahi." **4** Dialusi Jesus ma, "Aha do na dihagiotimu sian Au, inang? Napodo dapot dope hatihangKu." **5** Dung i didok inangNia i ma tu angka parkobas na disi, "Muda disuru Ia hamu mambaen sanga na aha, baen hamu ma songon i." **6** Adong do disi onom gunci ni aek na niparade, i ma sipakeon di na paias dirina halak dohot tu haporluan na asing-asing mangihutkon aturan ni ugamo Jahudi. Muat-muat saratus liter aek ma ganop gunci i. **7** Didok Jesus ma tu angka parkobas i, "Gohi hamu ma angka gunci i dohot aek." Jadi digohi halahi ma lopus sirmip be. **8** Dung i didok Jesus ma tu halahi, "Saonnari buat ma saotik aek i jana oban ma tu pangurus ni pesta on." Dioban halahi ma aek i tu pangurus ni pesta i. **9** Dung i didai pangurus ni pesta i ma aek i, na dung muba gabe anggur. (Nada diboto ia sanga sian dia ro anggur i, harana hum angka parkobas na mangusehon aek i sajo do na mamboto i.) Dung i dipiohon pangurus ni pesta i ma bayo pangoli i, **10** didok ia ma tu bayo i, "Anggo somalna anggur na dumenggan do parjolo dilehen halak. Jadi dung tarbahat diinum angka tamu i, i pe anso dilehen anggur na somal. Hape disimpan ho dope anggur na dumenggan, on dope anso diparuar ho!" **11** I ma tanda hahomangan na parjolo dibaen Jesus; i ma na nibaenNia di Kana na di Luat Galilea. Dipatuduhon Jesus ma hasangapanNia markite-hite hahomangan i. Gabe porsaya ma tuSia angka siseanNia i. **12** Dung i kehe ma Jesus, inangNia i dohot angka anggiNia rap dohot angka siseanNia tu Kapernaum, disi ma halahi piga-piga ari. **13** Donok noma hatihana anso dapot Pesta Paskah, jadi kehe ma Jesus tu Jerusalem. **14** Di Bagas Ni Debata na di Jerusalem, didapot Ia ma angka halak na manggadisi lombu, biri-biri dohot darapati; didapot Ia muse dope disi marjuguhan angka halak na manukarkon hepeng. **15** Dipature Ia ma sada sambok-sambok sian tali, diusir Ia ma sude angka pahan-pahanan i sian Bagas Ni Debata, biri-biri i sude dohot lombu i. Diparbalikkon Ia ma sude meja ni situkar hepeng i, gabe marsarsaran ma hepeng ni halahi. **16** Dung i didok Ia ma tu pangadis darapati i, "Oban hamu sude unggas i. Ulang

baen hamu gabe inganan parjagalan Bagas Ni Damang!" **17** Dung i tarsingot ma tu roha ni angka siseanNia i ayat na di Buku Na Badia i songon on, "Holong ni roha maradopkon BagasMu, sai marsigorgor do songon api na mambaen mosok!" **18** Jadi dialo angka parkuas ni halak Jahudi i ma Jesus. Didok halahi ma, "Baen ma jolo tanda hahomangan pabotohon tu hami paboa na adong hakMu mambaen songon on!" **19** Ninna Jesus ma mangalusi, "Rumpakkon hamu ma Bagas Ni Debata on, anso Hupajongjong mangulahi di bagasan tolu ari." **20** Didok halak Jahudi i ma, "Opat pulu onom taon honokna anso sidung dipajongjong Bagas Ni Debata on, hape giot pajongjongonMu ma hum tolu ari sajo?" **21** Tapi pamatangNia sandiri do anggo na nidokNia Bagas Ni Debata. **22** Jadi dung mulak mangolu Jesus mangulahi sian na mate, tarsingot ma angka siseanNia i na dung unjung didok Ia songon i. Gabe porsaya ma halahi tu na tarsurat di Buku Na Badia i dohot tu pandohan na nidok ni Jesus. **23** Hatiha di Jerusalem Jesus di Pesta Paskah i, bahat do halak na porsaya dung diida halahi angka hahomangan na nibaenNia. **24** Tapi anggo Jesus nada pos rohaNia di halahi, angke ditanda Ia do sude halahi. **25** Nada porlu baenon ni halak hatorangan tuSia taringot tu jolma, harana diboto Ia sandiri do sanga aha na adong di bagasan roha ni jolma.

**3:1** Adong ma sada halak Parise na margoar si Nikodemus pamimpin ni halak Jahudi. **2** Di sada borngin ro ma ia mandapotkon Jesus jana didok ia ma, "Gurunami, hami boto do Guru na nisuruhon ni Debata ho. Angke nada adong halak na bisa mambaen angka hahomangan songon na nibaenMi, anggo so didongani Debata do ia." **3** Dialusi Jesus ma, "Tutu do na Hudok on: Nada tarbaen sanga ise pe gabe anggota ni Harajaan Ni Debata, anggo so jolo sorang ia mangulahi." \*MANGULAHl: Sanga: Sian ginjang.\* **4** Didok si Nikodemus ma tu Jesus, "Bia ma he parjadina halak na dung magodang sorang mangulahi? Tarbaen dope lakna masuk mangulahi tu bortian ni inangna anso ditubuhon mangulahi?" **5** Dialusi Jesus ma, "Tutu do na Hudok tu ho: Anggo so sorang halak sian aek dohot sian Tondi, nada tarbaen gabe parsidohot di Harajaan Ni Debata. **6** Dibaen sibuk do na tubu sian sibuk, jana tondi do na tubu sian Tondi. **7** Ulang

homang rohamu muda Hudok: Angkon ditubuhon hamu sude mangulahi. **8** Na mangombus do alogo sanga na tudia giotnia; tabege do nian husasakna, tapi nada taboto sanga sian dia harorona jana tu dia keheha. Songon i muse ma halak na nitubuhon ni Tondi i." **9** "Tarbia ma parjadi ni i?" ning si Nikodemus manyapai. **10** Dialusi Jesus ma, "Guru ni halak Israel ma ho, hape hum i pe so diboto ho? **11** Tutu do na Hudok di ho: Na hami boto do na hami hatahon, jana na hami ida do na hami patorang; hape nada ra hamu manjagit na hami dok. **12** So ra hamu porsaya tu Au muda Hupaboa tu hamu taringot tu angka na di tano on; tarbia muse be pambaenna hamu porsaya tu Au muda Hupaboa tu hamu taringot tu na di banua ginjang? **13** So na adong sahalak pe na jungada manaek tu banua ginjang, tapi anggo sian banua ginjang madung adong Sahalak na mijur tu tano on, i ma Anak Ni Jolma i." **14** "Songon ulok tumbaga na nipatuginjang ni si Musa di sada hayu di halongonan i, laing songon i muse ma Anak Ni Jolma i angkon dipatuginjang, **15** anso sude halak na porsaya tuSia tarbaen maruli ngolu na manongtong. **16** Angke songon i ma holong ni roha ni Debata di portibi on jabat dilehen Ia AnakNia na sasada i anso sude halak na porsaya tuSia nada mago, tapi maruli di ngolu na manongtong. **17** Harana nada anso manguhumi portibi on umbaen na nitongos ni Debata AnakNia i tu tano on, tapi anso gabe Sipalua ni portibi on do." **18** "Sanga ise na porsaya tuSia nada be uhuman ni Debata di adopan ni paruhuman. Tapi anggo na so porsaya madung ditoru ni uhuman ni Debata, hara ni na so porsaya ia tu Anak Ni Debata Na Sasada i. **19** Tapi on do panguhuman i: Madung ro hatorangan i tu tano on, tapi humolongan do roha ni jolma i tu hagolapan ulang pado hatorangan i, harana jahat do pangalaho ni halahi. **20** Sude halak sibaen na jahat magigi do i tu na torang; nada ra ia ro tu na torang, angke nada jop rohania haidaan pangalahonia na jahat i. **21** Tapi anggo halak na mangkarejohon hasintongan, ro do ia tu na torang i; anso tarida angka pambaenna i, angke madung dibaen i markite-hite Debata." **22** Dung i kehe ma Jesus dohot angka siseanNia tu Luat Judea. Disi ma halahi sangombas jana mandidihon do halahi disi. **23-24** Hatiha i nada tarhurung dope si Johannes Pandidi. Di Aion do ia mandidihon, nada sadia dao i sian Salim, harana bahat do disi aek. Marroan ma halak

mandapotkon ia jana dipandidihon ia ma halahi. **25** Jadi adong ma deba sian sisean ni si Johannes i na martongkar dohot halak Jahudi \*HALAK JAHUDI: Dipiga-piga-piga naskah narobi didok: Sahalak Jahudi.\* taringot tu aturan haiason mangihutkon ugamo Jahudi. **26** Didapotkon halahi ma si Johannes jana disapai halahi ma, "Rabbi, jolma na rap dohot ho, na di ipar ni Batang aek Jordan i, na dung nisaksihonmi, mandidihon muse do Ia saonnari, jana marroan sude halak tuSia!" **27** Dialusi si Johannes ma, "Nada tarbaen jolma mangkarejohon bagi na aha pe, anggo so dilehen Debata i disia. **28** Hamu pe madung dibege hamu hudok, 'Nada au Kristus i. Hum patujolo sajo do au umbaen na disuru parjolo ulang Ia.' **29** Bayo pangoli do nampuna boru na niolina. Anggo dongan ni bayo pangoli i hum jongjong sajo do ia mandongani jana manangihon pangoli i jana jop ma rohania umbege sora ni pangoli i. Songon i ma au, saonnari marjop ni roha situtu do au. **30** Ia do na angkon mur pagodangon tapi anggo au angkon mur nipamenek do." **31** Ise na ro sian ginjang do di ginjang ni sudena. Na ro sian tano on, di tano on do, jana mangkobari do ia taringot tu tano on. Anggo na ro sian ginjang i, di ginjang ni sudena do. **32** Angka na niidaNia dohot na nibegeNia do disaksihon Ia, hape umpe sahalak na mangkaporsayai hasaksianNia. **33** Sanga ise na porsaya di hasaksianNia i, i do na mangoku bahaso na tigor Debata. **34** Sanga ise na nisuru ni Debata, barita sian Debata do dioban Ia, harana madung dilehen Debata TondiNia i, nada hasahatan bahatna. **35** Dihaholongi Damang do AnakNia jana madung dipasahat Damang sasudena tuSia. **36** Sanga ise na porsaya tu Anak i, halahi do na maruli ngolu na manongtong. Tapi anggo halak na so ra porsaya tu Anak i indangkon na dapot ni halahi ngolu na manongtong i, jana hamumuruk ni Debata do tongtong adop halahi.

**4:1** Dibege halak Parise ma na umbahat sisean ni Jesus, dohot na nididihonNia ulang pado si Johannes. **2** (Nian nada Ia na mandidihon halak, tapi angka siseanNia ido.) **3** Dung tarboto tu Jesus na dung tarbege na songon i tu halak Parise, gabe kehe ma Ia sian Judea jana mulak tu Galilea. **4** Angkon sian Samaria do Ia mamolus di pardalananNia i. **5** Dung di Samaria lalu ma Jesus tu sada kota na margoar Sikhar, nada sadia dao

sian tano na nilehen ni si Jakob narobi tu anaknia na margoar si Josep. **6** Disi ma sumur ni si Jakob i. Loja sajo ma Jesus na mardalan i, gabe kehe Ia juguk maradian di topi ni sumur i. Hira-hira pukul dua bolas ma hatiha i. **7** Dung i ro ma sada dadaboru Samaria muhat tusi, jadi didokkon Jesus ma tusia, "Lehen ma Au minum." **8** Angke ma kehe tu kota anak siseanNia manobusi panganon. **9** Dialusi boru Samaria i ma, "Halak Jahudi do Ho hape au halak Samaria do. Biasi mangido minum Ho tu au?" (Harana na so ra do halak Jahudi mardongan dohot halak Samaria.) \*HARANA NA SO RA DO HALAK JAHUDI MARDONGAN DOHOT HALAK SAMARIA: Sanga: Halak Jahudi na so ra do mamake mangkuk na nipake ni halak Samaria.\* **10** Dialusi Jesus ma, "Sugari ma diboto ho silehen-lehen ni Debata jana ditanda ho na mangido minum sian ho, gabe ho sandiri noma mangido sian Ia, jana lehenonNia ma di ho aek na mangolu." **11** Didok anak boru i ma, "Tapi so adong timba di Tuhan i, hape sai bagas sumur on. Sian dia ma dapot Tuhan i aek na mangolu i? **12** Ompungnami si Jakob do na mangalehen sumur on di hami. Ia sandiri pe sian sumur on do dibuat ia inumonnia; songon i muse angka dakdanaknia dohot pahan-pahanannia. Gumodang dehe lakna Ho sian ompungnami si Jakob?" **13** Didok Jesus ma, "Sude halak na minum sian aek on manguas do mangulahi, **14** tapi anggo halak na manginum aek na giot lehenonKi disia, nada manguas be ia salolot-lolotna. Angke anggo aek na giot lehenonKi angkon gabe sada mata mual na marbuldak-buldak do i di dirinia jana mangalehen hangoluan na so mantak." **15** Didok anak boru i ma, "Lehen ma di au aek i, anso ulang sai manguas be au, jana anso ulang mulak-ulak au tuson muhat." **16** "Kehe ma ho jolo mamiohon halaklahimu, dung i ro ma ho mangulahi tuson," ninna Jesus. **17** "So adong halaklahingku," ning anak boru i mangalusi. Didok Jesus ma, "Tutu do na nidokmi, 'Nada adong halaklahimu, **18** harana madung lima halaklahimu jana halaklahi na nidonganammu na saonnari i, anggo satutuna nada halaklahimu i. Jadi, tutu do na nidokmi.'" **19** "Saonnari pe anso huboto, panurirang do hape Tuhan i," ning anak boru i. **20** "Anggo angka ompunami di dolok on do marsomba, tapi anggo Ho mandok hum di Jerusalem sajo do inganan ni halak marsomba." **21** Didok Jesus ma,



"Porsaya ma ho di Au. Sada hatiha sombaon ni halak ma Damang, nada be di dolok on jana nada muse di Jerusalem. **22** Hamu angka halak Samaria disomba hamu do na so ditanda hamu, tapi anggo hami halak Jahudi, na hami tanda do na hami somba; angke sian halak Jahudi do ro haluaan i. **23** Tapi na giot ro do hatihana, jana madung ro saonnari, marsomba ma angka parsomba na tutu tu Ama i di bagasan Tondi dohot hasintongan; angke jop do roha ni Debata marnida halak na songon i. **24** Tondi do anggo Debata, jana angka na giot marsomba tu Debata, angkon marsomba di bagasan Tondi dohot hasintongan." **25** Didok anak boru i ma tu Jesus, "Huboto do na giot ro humani Mesias i (i ma na margoar Kristus). Jadi muda ro Ia, paboaNia ma sasudena tu hita." **26** "Au do Ia, na mangkataion dohot ho," ninna Jesus. **27** Disi ma ro angka sisean ni Jesus manguhahi. Homang ma roha ni halahi mida Jesus mangkobar dohot sada anak boru. Tapi umpe sahalak sian halahi na marsapa, "Aha do na nihagiotiMu? Sanga: Aha do na nihataanMu dohot ia?" **28** Dung i ditadingkon anak boru i ma guncinia i disi, kehe ma ia marlojong tu kota jana didok ia ma tu angka halak na di kota i, **29** "Beta ma taligi halak na paboahon tu au sasudena na dung hubaen. Ia dehe Kristus i?" **30** Dung i marruaran ma halak sian kota i kehe mandapotkon Jesus. **31** Jadi laing di hatiha i, disuru angka siseanNia i ma anso mangan jolo Jesus, "Mangan ma jolo Rabbi," ning halahi. **32** Tapi dialusi Jesus ma, "Adong do di Au sipanganon, tapi nada diboto hamu sanga sipanganon aha i." **33** Dung i mamungka ma sisean i marsisapaan sama halahi, "Na adong do halak maroban panganon diSia?" **34** Dung i didok Jesus ma, "Anggo sipanganonKi, i ma na mangihutkon hagiort ni na marsuru Au, jana pasidungkon parkarejoan na nilehenNia sikarejohononKu. **35** Didok hamu, 'Opat bulan nari sabion ma.' Tapi anggo Au mandok di hamu: tangkas ma ligi hamu tu angka ladang i. Nada he madung tarsabi i? **36** Manjagiti upana ma angka na manyabi i; jana dipalagut ma suhana i tu hangoluan na so mantak. Rap marsonang-sonang ma panyabur dohot panyabi. **37** Jadi tutu do hata ni pandohan on, 'Halak do manyuan, hape na asing do manyabi.' **38** Tu ladang na nikarejohon ni halak do hamu Husuru manyabi; halak do na markarejo disisi hape hamu do na mambuat suha ni karejo ni halahi." **39**

Gabe bahat ma halak Samaria na sian kota i porsaya tu Jesus hara ni na nidok ni anak boru i, 'Madung dipaboa Ia tu au sasudena parkarejoanku nabaruon.' **40** Jadi dung marsuo angka halak Samaria i dohot Jesus gomos ma dipangidohon halahi anso tinggal Ia rap dohot halahi. Jadi disi ma Jesus dua ari. **41** Dung i umbahat dope halak gabe porsaya tu Jesus hara ni na niajarkonNia sandiri tu halahi. **42** Didok halahi ma tu anak boru i, "Saonnari madung porsaya hami, nada hara ni angka na nipaboami be tu hami, tapi hara ni na dung hami bege sandiri sian Ia, jana madung hami boto tutu do Ia Sipalua ni portibi on." **43** Dung adong dua ari, kehe ma Jesus tu Galilea. **44** Jesus sandiri do manyaksihon, "Nada dipasangapi panurirang, anggo di kota hagodanganna sandiri." **45** Tapi dung lalu Ia di Galilea, marjop ni roha ma halak na disi manjagit Ia, harana taran di Jerusalem halahi di Pesta Paskah i, madung diida halahi sude na nibaen ni Jesus hatiha i. **46** Jadi bolkas ma Jesus tu Kana di Galilea, di kota i ma na nibaenNia aek gabe anggur. Adong ma sahalak pagawe ni bagas godang na topet marnyae anakna di Kapernaum. **47** Dung dibege ia na ro Jesus sian Judea tu Galilea, didapotkon ia ma Jesus jana dipangidohon ia ma anso ro Jesus tu Kapernaum laho pamalumkon anaknia na giot mate. **48** Didok Jesus ma tu pagawe ni bagas godang i, "Anggo so jolo diida hamu angka na luar biasa dohot angka hahomangan, laing na so ra do hamu porsaya." **49** Didok pagawe ni bagas godang i ma, "Tuhan tibu ma Ho ro dompak so mate anakki." **50** Didok Jesus ma, "Kehe ma ho mangolu do anakmi." Jadi porsaya do bayo i di na nidok ni Jesus i, laing kehe ma ia. **51** Di tonga dalan i dope di na laho mulak ia, ro ma angka naponsonia mandapotkon ia laho paboahon tusia, "Madung mangolu do anakmi!" **52** Dung i disapai ia ma tu halahi sanga pukul piga mamungka malum anaknia i. Alus ni halahi, "Natuari hira-hira pukul sada i mondap ma na milas i." **53** Dung i diingot amang ni dakdanak i ma laing di jom i ma didok Jesus tusia, "Mangolu do anakmi." Gabe porsaya ma ia dohot halahi na sabagas tu Jesus. **54** I ma tanda hahomangan na paduahon dibaen Jesus di Galilea dung ro Ia sian Judea.

**5:1** Dung i adong ma pesta ni halak Jahudi, gabe dohot ma Jesus tu

Jerusalem. **2** Di Jerusalem di lambung ni "Horbangan Biri-biri," adong do sada paridian. \***"HORBANGAN BIRI-BIRI", ADONG DO SADA PARIDIAN:** Sanga,, "Tobat Biri-biri," adong do sada inganan.\* Di hata Ibrani digoar do i Betesda. \***PARIDIAN:** Sanga,-piga naskah narobi didok: Betsata.\* Adong muse do lima sopo-sopo humaliang paridian i. **3** Bahat do angka na marnyae marmodoman disi; adong na mapitung, adong na timpang, adong muse na pangpangon. **Sudena halahi painte-intehon panggulsak ni aek i. 4 Harana sai mijur do huhul surusuruan ni Tuhan tu bagasan paridian i, manggaor aek i. Jana sanga ise sian na marnyae i parjolo masuk tu paridian i hatiha manggulsak aekna i, malum ma nyaena i; sanga na nyae aha pe angkon malum. 5** Adong ma disi sada bayo na dung tolu pulu salapan taon honokna marnyae. **6** Diida Jesus ma ia modom disi, jana diboto Jesus ma na dung honok bayo i marnyae; gabe didok Jesus ma tusia, "Giot dehe ho malum?" **7** Dialusi bayo na marnyae i ma, "Nada adong donganku dison Tuhan na pamasuk au tu paridian i muda hatiha manggulsak aek i. Jadi hatiha giot masuk dope au tu paridian i, hape ma dipajolo halak na asing masuk." **8** Gabe didok Jesus ma tusia, "Jongjong ma ho, oban lagemi jana mardalan ma ho." **9** Manigor malum ma bayo i. Dung i dioban ia ma lagenia, kehe ma ia mardalan. Topet do Ari Sabat hatiha i. **10** Jadi hara ni i didok angka pamimpin ni halak Jahudi ma tu bayo na baru malum i, "Ari Sabat do da sadari on. Nada tola obanonmu lagemi." **11** Tapi ning ia ma mangalusi, "Halak na pamalumkon au nangkin do na marsuru au; didok Ia, 'Oban ma lagemi, mardalan ma ho.'" **12** "Ise ma he i na marsuru ho mardalan, mangoban lagemi?" ninna halahi manyapai ia. **13** Tapi hape na so ditanda bayo na malum i dope sanga ise halakna, hara ni bahat ni jolma disi. Jesus pe nada haidaan be di tonga-tonga ni halak na bahat i jana madung kehe Ia sian inganan i. **14** Dung i marsuo ma Jesus dohot bayo i di Bagas Ni Debata. Didok Jesus ma tusia, "Saonnari madung malum ho; ulang be datdati mardosa. Angke muda mambaen dosa dope ho, na jumatjat sian on dope taononmu saulahon." **15** Jadi kehe ma bayo i paboahon tu angka pamimpin ni halak Jahudi, Jesus do hape na pamalumkon ia. **16** Markite-hite i, dipungka halak Jahudi ma mangaroha-rohai Jesus, hara ni

na nipamalumNia halak di Ari Sabat. **17** Tapi didok Jesus ma tu halahi, "Tongtong do markarejo Damang; jana Au pe angkon laing markarejo do." **18** Angka pandohan ni Jesus i ma mambaen mur dirohahi angka pamimpin ni halak Jahudi i giot mamunu Ia. Nada hum hara ni na mangalanggar tona ni ugamo sajo, i ma taringot tu Ari Sabat umbaen na songon i dibaen halahi, tapi dohot do muse hara ni hataNia na mandok AmangNia Debata; astuanna disarupahon Ia ma Ia dohot Debata. **19** Dialusi Jesus ma halahi songon on, "Ingot hamu ma na Hudok on: Nada dibaen Anak i sanga na aha pe mangihutkon roha-rohaNia sandiri. Sanga aha na niidaNia dibaen AmangNia, hum i sajo do dibaen Ia. Angke sanga aha na nibaen ni Ama i, laing i muse do dibaen Anak i. **20** Angke na holong do roha ni Ama i mida Anak i. Dipatidahon Ia muse do sasude na nibaenNia sandiri tu AnakNia i, dohot angka pambaenan na gumodang, patidahonNia dope tu AnakNia i anso longang hamu. **21** Songon Damang na manyungguli halak na mate, jana dilehen Ia hangoluan tu halahi; laing songon i muse ma Anak i mangalehon ngolu tu halak, sanga ise giot ni rohaNia. **22** Nada mandabu uhum anggo Ama i sandiri sanga na tu ise pe. Angke anggo kuaso laho mandabu uhum, na dung dipasahat do i di AnakNa i. **23** Dibaen Damang pe i anso dipasangap halak do Anak i songon na ni baen ni halak tu Damang. Halak na so pasangapkon Anak i, nada diparsangapi ia muse Ama na marsuru Anak i. **24** Hudok ma tu hamu: Satutuna sanga ise na manangihon hata na Hudok jana na porsaya tu na marsuru Au, halahi ma na dapotan hangoluan na so mantak. Nada sihumon be i; madung malua ia sian hamatean jana dapotan hangoluan. **25** Tutu do na Hudok di hamu: Ro ma hatihana, jana tardok madung ro i, begeon ni halak na dung mate i ma sora ni Anak Ni Debata, jana sanga ise na umbegesa dapotan hangoluan. **26** Dibaen songon Ama i marhangoluan di bagasan diriNia sandiri, laing songon i ma madung dibaen Ama i do Anak i, gabe marhangoluan di bagasan diriNia sandiri. **27** Madung dilehen Ia kuaso tu AnakNia laho manontuhon uhuman, harana Anak Ni Jolma i do Ia. **28** Ulang longang rohamunu umbege on; harana ro do hatihana, sude halak na di bagasan kuburan i begeonna ma soraNia, **29** jana haruar ma halahi sian kuburan i. Jana sude halak na mambaen na denggan disungguli ma tu

hangoluan. Tapi anggo sibaen na jahat disungguli tu hamatean." **30** "Nada tarpatupa Au sanga aha pe anggo sian roha-rohangKu sandiri. Sanga aha na niparentahon ni Debata tu Au, hombar tusi do Au manontuhon uhuman. Hara ni i, adil do na Huputuskon i, angke nada na mambaen roha-rohangKu sandiri Au. Hagiot Ni Damang na marsuru Au, i sajo do na Huoloi. **31** Anggo Au sandiri do na mangalehen hasaksian taringot tu diringKu sandiri, nada tarjagit hasaksianKi. **32** Tapi adong do sada halak na asing mangalehen hasaksian taringot tu Au jana Huboto do bahaso na tutu hasaksianNia i. **33** Hamu sandiri pe madung ditongos hamu suruanmunu tu si Johannes jana si Johannes pe madung dilehen ia hasaksian na tutu taringot tu Au. **34** Hupajojor pe i sudena, nada hara ni na porlu di Au hasaksian sian jolma, tapi anso dipalua do hamu. **35** Songon lampu na gara jana na marsinondang do da anggo si Johannes; jana hamu pe, anggo hum santongkin ra do hamu ditorangi sondang ni lampu i. **36** Tapi adong dope di Au hatorangan na ummarga sian na nilehen ni si Johannes. Karejo na nidok ni Damang karejohononKu, i ma karejo na Hubaen saonnari, sudena i patorangkon bahaso Ama i do na marsuru Au. **37** Jana Ama na marsuru Au pe madung dilehen Ia hasaksian taringot tu Au. Anggo hamu nada unjung dope umbege sora ni Ama i, sanga marnida bohiNia. **38** Nada diargahon hamu di bagasan rohamunu angka hataNia, angke na so porsaya do hamu tu halak na nisuruNia. **39** Diparsiajari hamu do nian Buku Na Badia i angke dipikir hamu dapot hamu ma hangoluan na so mantak i muda dung diparsiajari hamu i. Jana Buku Na Badia i sandiri pe disaksihon i do taringot tu Au! **40** Hape nada ra hamu ro tu Au laho manjagit hangoluan na so mantak. **41** Nada Hujalahi pujian sian jolma. **42** Hutanda do hamu. Huboto do na so dihaholongi hamu Debata di bagasan rohamunu. **43** Mardongan kuaso na sian Damang do Au ro, hape nada dijagit hamu Au. Hape anggo halak na asing na ro mamake kuasona sandiri, dijagit hamu do. **44** Tarbia muse ma pambaenmunu porsaya, harana na manjalahi sangap do hamu sama hamu, anggo sangap sian Debata na sasada i nada dijalahi hamu. **45** Ulang ma didok rohamunu na mangaduhon hamu Au tu Damang. Si Musa do na mangaduhon hamu--harana si Musa do na nipainte-intemunu. **46** Sugari na tutu hamu porsaya

tu si Musa, angkon laing porsaya muse do hamu tu Au, angke taringot tu Au do na nisuratkon ni si Musa. **47** Tapi muda nada dihaporsayai hamu sanga aha na nisurat ni si Musa, tarbia ma pangkaporsayaimunu tu na Hudok?"

**6:1** Dung i kehe ma Jesus mangulahi tu ipar ni Dano Galilea (na nigoaran muse Dano Tiberias). **2** Diihutkon halak na bahat i ma Ia hara ni na dung niida ni halahi angka pangalaho hahomangan na nibaenNia dompak pamalumkon angka na marnyae Ia. **3** Manangkok ma Jesus rap dohot angka siseanNia i tu sada dolok-dolok, laing dipajuguk halahi ma disi. **4** Hatiha i laho dapot ma Pesta Paskah ni halak Jahudi. **5** Di na manaili Jesus humaliang, diida Ia ma bahat sajo halak marroan mandapotkon Ia. Dung i didok Ia ma tu si Pilipus, "Di dia ma tobusanta panganon anso tarlehen hita halak na bahat on mangan?" **6** (Didok Jesus pe songon i laho mancubo roha ni si Pilipus doIa; harana anggo Jesus sandiri diboto Ia hian do sanga aha na giot baenonNia.) **7** Dialusi si Pilipus ma, "Roti arga dua ratus hepeng perak nada tuk di angka jolma on, harupe hum saotik be sahalak." **8** Sahalak sian sisean ni Jesus na asing, i ma si Andreas anggi ni si Simon Petrus, mandok: **9** "Adong do dison sada dakdanak na maniop lima roti dohot ihan duakibung. Tapi aha ma arti ni i tu halak na songon on bahatna?" **10** "Suru hamu ma sudena halahi juguk," ninna Jesus tu angka siseanNia i. Bahat do ruput-ruput disi, gabe marjuguhan di ruput-ruput i ma sude halak i -- adong ma hira-hira lima ribu halak halaklahi. **11** Dung i dibuat Jesus ma roti i, didok Ia ma tarimakasi tu Debata. Lalu diparbagi-bagihon Ia ma roti i tu halak na bahat i. Laing songon i ma dibaen Ia tu ihan i. Mangan ma sudena halahi sabutong-butongna. **12** Dung butong na mangan i, didok Jesus ma tu angka siseanNia i, "Palagut hamu ma teba-teba ni panganon i ulang adong na sayang." **13** Dipalagut angka siseanNia i ma teba-teba ni panganon i dapot ma dua bolas karanjang gok teba-teba ni roti na lima i na nipangan ni halak na bahat i. **14** Dung diida halak na bahat i hahomangan na nibaen ni Jesus i, ninna halahi ma, "On ma tutu panurirang na giot ro i tu tano on!" **15** Dung i giot paksaon ni halahi ma Jesus gabe raja ni halahi. Tapi diboto Jesus do na di roha ni halahi i,

gabe kehe ma sada Ia tu dolok-dolok i. **16** Dung potang ari, manuat ma angka sisean ni Jesus tu dano i. **17** Marparau ma halahi manyiborangi dano i tu Kapernaum. Haru madung borngin laing so ro dope Jesus mandapoti halahi. **18** Jadi mamungka ma marombak dano i hara ni pangombus ni alogo na gogo. **19** Madung hira-hira opat tu lima kilometer daona halahi marparau tu tonga-tonga ni dano i; jadi ompot ma diida halahi ro Jesus mardalan di ginjang aek i mandapotkon parau ni halahi i. Mabiari situtu ma halahi. **20** Tapi didok Jesus ma tu halahi, "Ulang hamu mabiari, Au do i!" **21** Giot dipamasuk halahi ma Ia tu parau i hape ma lalu halahi tu inganan sitopoton ni halahi i. **22** Ancogotna i diida halak na tinggal di siborang ni dano i ma, hum sada do parau disi. Diboto halahi do na dung parjolo kehe anggo sisean ni Jesus jana na so dohot Jesus di bagasan parau i rap dohot angka siseanNia i. **23** Adong do angka parau na marroan sian Tiberias maradian donok tu inganan parmanganan ni halak na mangan roti i dung didok Jesus tarimakasi tu Debata. **24** Dung diida halahi na so disi Jesus dohot angka siseanNia i, masuk ma halahi tu parau laho kehe tu Kapernaum manjalahi Jesus. **25** Dung marsuo halahi dohot Jesus di ipar ni dano i, disapai halahi ma tuSia, "Ale, Rabbi sadihari dehe Ho lalu tuson?" **26** Dialusi Jesus ma, "Satutuna do na Hudok tu hamu: Nada hara ni na dung diastui hamu angka hahomangan na Hubaen i umbaen na nijalahanmunu Au, tapi hara ni na dung butongan do hamu mangan roti i. **27** Ulang pola marloja-loja hamu markarejo hara ni sipanganon na ra abis dohot na ra busuk. Markarejo ma hamu, anso dapot hamu sipanganon na so ra busuk jana na mangalehen hangoluan na so mantak. Lehenon ni Anak Ni Jolma i do di hamu panganon i; angke madung dilehen Damang, i ma Debata, kuaso i diSia." **28** Dung i disapai halahi ma tuSia, "Aha do sibaenonami anso tarkarejohon hami hagiote ni Debata?" **29** Dialusi Jesus ma, "On ma na nipangido ni roha ni Debata sikarejohononmunu diSia: Haporsayai hamu ma na nisuru ni Debata i." **30** Didok halahi ma, "Antong anggo songon i, adong dehe tanda hahomangan sibaenonmi Guru siidaonna ni anso porsaya hami tu Ama i? Patidahon ma sanga aha do na tarbaen Ho!" **31** Anggo angka ompunami mangan manna do di halongonan, songon na adong tarsurat, 'Dilehen Ia do di halahi sipanganon na sian banua ginjang.'

" **32** Dung i didok Jesus ma tu halahi, "Satutuna Hupaboa ma di hamu: Anggo na nilehen ni si Musa i di hamu, nada sipanganon na sian banua ginjang i; anggo sipanganon na sian banua ginjang i, i ma sipanganon na satutuna lehenon ni Damang di hamu. **33** Angke anggo sipanganon na nilehen ni Debata, i ma na mijur sian banua ginjang jana na mangalehen ngolu na so mantak tu portibi on." **34** Dung i ninna halahi ma, "Ale Tuhan, lehen ma di hami tontong sipanganon na songon i." **35** Jadi didok Jesus ma tu halahi, "Au do roti na mangalehen hangoluan; sanga ise na ro tu Au nada malean be ia, jana sanga ise na porsaya tu Au nada manguas be ia. **36** Tapi madung Hudok tu hamu, 'Bope madung diida hamu Au, tapi nada porsaya hamu.' **37** Sudena halak na dung dipasahat Damang tu Au, ro ma halahi tu Au. Nada tulahonKu, sanga ise pe na ro tu Au. **38** Angke umbaen na mijur pe Au sian banua ginjang, na giot patuluskon hagiots ni na marsuru Au do, nada hagiotsKu sandiri. **39** Jana songon on ma hagiots ni na marsuru Au; anso ulang Huagohon sahalak pe sian sudena halak na nipasahatNia tu Au; tapi anso Hupangolu do halahi mangulahi dung di Ari Parpudi. **40** Harana on do hagiots ni Damang: Sudena halak na marnida Anak i jana porsaya tuSia, i do na marhangoluan na so mantak jana pangoluonKu ma halahi mangulahi dung di Ari Parpudi." **41** Mamangka ma mungut-ungut halak Jahudi tu Jesus, hara ni na nidokNia i, "Au do roti na mijur sian banua ginjang i." **42** Didok halahi ma, "Na he Jesus anak ni si Josep i do on? Hami tanda do amangNia dohot inangNia! Biasi ma he didokkon Ia na mijur sian banua ginjang Ia?" **43** Dung i didok Jesus ma tu halahi, "Ulang marungut-ungut hamu. **44** Nada tarbaen sanga ise pe ro tu Au, anggo so disosoi Damang na marsuru Au halakna i tu Au; jana pangoluonKu ma halahi di Ari Parpudi. **45** Tarsurat do di buku ni angka panurirang songon on: Ajaran ni Debata ma sudena halak. Jadi sudena halak na manangihon Debata jana na marsiajar sian Ia, angka halahi ma na ro tu Au. **46** Nada na mandok na dung adong halak unjung mida Damang i. Anggo na dung unjung mida Damang, hum na ro sian Damang i do. Sasada Ia sajo ma i!" **47** "Tutu do na Hudok on tu hamu: Halak na porsaya tu Au, i do na marhangoluan na so mantak. **48** Au do roti hangoluan. **49** Mangan manna do angka ompumunu di halongonan hape laing marmatean do halahi. **50**



Tapi asing situtu do anggo sipanganon na mijur sian banua ginjang i; halak na mangankon sipanganon i, nada mate be. **51** Au do roti na mijur sian banua ginjang i, i ma sipanganon na mangalehen hangoluan. Halak na mangankon sipanganon on, mangolu ma salolot-lolotna. Anggo sipanganon na giot lehenonKi, i ma pamatangKu. LehenonKu ma pamatangKon anso mangolu portibi on." **52** Gabe martongkari ma halak Jahudi sama halahi hara ni hata ni Jesus nangkinan i. "Bia do pangalehen ni Bayo on di pamatangNia i tu hita gabe sipanganon?" ninna halahi. **53** Dung i didok Jesus ma tu halahi, "Tutu do na Hudok on di hamu: Anggo so dipangan hamu do pamatang ni Anak Ni Jolma i jana nada diinum hamu mudarNia, nada adong hangoluan na tutu di bagasan hamu. **54** Anggo halak na mangankon pamatangKu jana manginum mudarKu marhangoluan na so mantak do jana pangoluonKu ma halahi mangulahi di Ari Parpudi. **55** Angke pamatangKu do sipanganon na tutu jana mudarKu do siinumon na tutu. **56** Halak na mangankon pamatangKu jana na manginum mudarKu, ngolu ni halahi ma na sada tu Au jana ngolungKu pe sada tu halahi. **57** Damang na mangolu i do na marsuru Au jana Au pe na mangolu sian Damang i do. Laing songon i muse ma na mangankon pamatangKu, laing sian Au ma ia mangolu. **58** On do roti na mijur sian banua ginjang i: Nada sarupa sipanganon on dohot sipanganon na nipangan ni ompumunu. Angke dung dipangan halahi sipanganon i, laing mate do halahi. Tapi anggo na mangan sipanganon on, mangolu do salolotna." **59** Hatiha mangajari ma Jesus di bagas paribadatan na di Kapernaum didokkon Ia sudena i. **60** Bahat do angka sisean ni Jesus umbege angka hata na nidok ni Jesus i. Didok halahi ma, "Ma kasartu do pangajaran on. Ise ma he na tahan manangihonsa?" **61** Haru pe so jolo adong halak na paboahonsa, madung diboto Jesus do na marungut-ungut angka siseanNia i taringot tusi. Dung i gabe ning Ia ma tu halahi, "Adong he na so sonang rohamunu di pangajaran i? **62** Bia do muda diida hamu saulahon Anak Ni Jolma i mulak manaek tu ingananna humani? **63** Tondi i do na mangalehen hangoluan, anggo sibuk nada adong guna ni i. Angka hata na Hudokkon, i do tondi dohot hangoluan. **64** Hape laing adong dope sian hamu na so porsaya." (Madung diboto Jesus hian do sian mulana sanga ise-ise na so ra porsaya

dohot ise na giot manghianat tuSia.) **65** Dung i didok Jesus ma mangulahi, "Hara ni i ma umbaen na Hudok tu hamu, umpe sahalak tarbaen ro tu Au anggo so dilehen Damang dalam disia laho mandapotkon Au." **66** Mamungka sian i bahat ma sian angka siseanNia i manadingkon Ia, jana nada ra be halahi mangihutkon Ia. **67** Dung i disapai Ia ma siseanNia sidua bolas halak i, "Adong he na giot tadingkononmunu muse ma Au?" **68** Dialusi si Petrus ma, "O Tuhan, giot tu ise dope hami kehe? Hum hataMi sajo do na mangalehen hangoluan na so mantak. **69** Porsaya do hami jana marpos ni roha, Ho do Na Badia na ro sian Debata." **70** Dialusi Jesus ma tu halahi, "Au do nian mamili hamu na dua bolas halak on. Tapi haru songon i pe gabe songon Sibolis do sahalak sian hamu!" **71** Si Judas anak ni si Simon Iskariot do na nidok ni Jesus disi. Angke haru pe sahalak sian sidua bolas halak i si Judas, ia do na giot manghianat tu Jesus.

**7:1** Dung i mardalani ma Jesus di Galilea. Nada ra Ia anggo tu Judea hara ni angka parkuaso ni halak Jahudi na disi, na sai manjalahi dalam giot mamunu Ia. **2** Donok ma hatiha i Pesta Undung-undung Bulung Rata ni halak Jahudi. **3** Jadi didok angka kahanggiNia ma tuSia, "Kehe ma Ho sian on tu Judea, anso laing diida angka siseanMi parkarejoanMu. **4** Nada adong halak na manabunihon sanga aha na nibaennia muda giot tarbonggal goarnia. Muda baenonMu ma na songon i, angkon botoon ni na satano on ma i!" **5** (Angke nada porsaya angka kahanggiNia i sandiri tuSia.) **6** Jadi dialusi Jesus ma, "Nada hatihana dope anggo di Au, tapi anggo di hamu tongtong do dapot hatihana. **7** Nada na ra portibi on mangkagigihon hamu. Tapi anggo Au tutu ma hagigian ni portibi on, hara ni na sai Hudok tu portibi on bahaso na jahat pambaenanna. **8** Hamu sajo ma jolo kehe tu pesta i. Anggo Au indangkon ma sai kehe tusi, \*INDANGKON MA SAI KEHE TUSI: Sanga: Nada kehe dope Au.\* angke nada hatihana dope di Au." **9** Songon i ma didok Jesus tu angka kahanggiNia i, jana laing di Galilea ma Ia tading. **10** Dung kehe kahanggiNia tu pesta i, kehe muse ma Jesus tusi sip-sip. **11** Dijalak-jalahi angka parkuaso ni halak Jahudi ma Jesus di pesta i, sapa-sapa ma halahi, "Di dia do Ia ulaning?" **12** Bahat ma hata-hata ni jolma na bahat i taringot tuSia. Adong na mandok, "Na burju

do Ia." Adong muse na mandok, "Nada, na paliluhon halak na bahat do Ia." **13** Tapi sahalak pe nada adong na puluk sian halahi mandok hatana torus torang taringot tuSia, hara ni na mabiar mida halak Jahudi i. **14** Di tonga-tonga ni pesta i masuk ma Jesus tu Bagas Ni Debata mangajari. **15** Homang sajo ma roha ni angka halak Jahudi i. Didok halahi ma, "Sian dia do parbinotoan ni Bayo on, hape nada jungada Ia sikola?" **16** Dialusi Jesus ma, "Sanga aha na Huajarkon i nada pangajaranKu i, tapi pangajaran ni na marsuru Au do i. **17** Sanga ise na ra mangihutkon hagiort ni Debata, botoon ni halahi ma sanga na sian Debata do pangajaranKi, sanga na sian roha-rohangKu sandiri. **18** Anggo halak na marroha-roha mandok hatana, na manjalahi sangap tu dirina sajo do i. Tapi anggo halak na manjalahi sangap tu na marsuru ia, i ma halak na tigor; nada adong gabus disia. **19** Madung nian dilehen si Musa di hamu angka Parenta Ni Debata. Tapi sahalak pe sian hamu umpe adong na mangoloi angka Parenta i. Biasi ma he giot bunuonmunu Au?" **20** Dialusi halak na bahat i ma, "Na marsibolis do Ho, ise he na giot mamunu Ho?" **21** Dialusi Jesus ma, "Hum sada dope Hubaen pangalaho na so somal ma longang hamu sude. **22** Dibaen si Musa do paraturan di hamu, angkon sunatonmunu sude dakdanakmunu. Jana laing manyunat halak do hamu di Ari Sabat. (Anggo satutuna nada si Musa na parjolo mamungka manyunat halak, tapi angka ompunta na mangolu dompak so si Musa do.) **23** Muda disunat hamu halak di Ari Sabat, anso ulang mangalanggar Parenta Ni si Musa, biasi anggo songon i muruk hamu tu Au hara ni na Hupamalum sahalak di Ari Sabat? **24** Ulang ma marojahan tu na tarida sajo hamu muda manguhumi halak, tapi uhum na tigor ma baen hamu." **25** Dung i adong ma deba halak Jerusalem na mandok, "Na he on do halakna, na giot bunuon ni halahi i? **26** Tapi ligi da! Laing marpupu do Ia mangkobari di jolo ni halak na bahat jana nada adong na mangkahua Ia, jana nada adong na mandok bagi aha tuSia! Sanga, betak na dung tangkas do diboto angka parkuasonta, na tutu do Ia Kristus i. **27** Hape anggo haroro ni Kristus i nada dong halak na umboto i sanga sian dia asalNa! Anggo Bayo on, inda he taboto do asalNia." **28** Hatiha mangajari Jesus di bagasan Bagas Ni Debata, didok Ia ma, "Nian di tanda hamu do sanga ise Au jana diboto hamu sian dia harorongKu? Nada

marhite roha-rohangKu sandiri umbaen na ro Au, tapi na nisuru ni Na Tigor i do Au, tapi nada ditanda hamu Ia. **29** Anggo Au Hutanda do Ia, harana sian Ia do harorongKu jana Ia do na marsuru Au." **30** Jadi dirohahon halahi ma giot manangkup Ia, tapi inda adong na puluk manjama Ia, angke nada dapot dope hatihaNa. **31** Tamba ni i, bahat muse do sian angka jolma na bahat i na porsaya tuSia, didok halahi ma, "Muda ro Kristus i tarbaen Ia dope ulaning hahomangan umbahat sian na dung binaenNia on?" **32** Dibege halak Parise ma hata-hata ni halak na bahat taringot tu Jesus. Jadi hara ni i, disuru halahi ma dohot angka sintua ni malim, piga-piga halak panjago ni Bagas Ni Debata anso kehe manangkup Jesus. **33** Didok Jesus ma, "Hum santongkin nari noma Au rap dohot hamu. Dung i mulak ma Au mandapotkon na marsuru Au. **34** Jalahanmunu ma Au tapi nada dapot hamu be: Harana nada tarbaen hamu ro tu ingananKi." **35** Dung i didok angka halak Jahudi i ma, "Na giot tudia muse dehe Ia umbaen jabat nada tarbaen hita mandapotkon Ia? Adong he ulaning na giot kehe mandapotkon halak Jahudi na mangaranto di tonga-tonga ni halak Junani i ma Ia jana giot ajaranNia ma angka halak Junani i? **36** Aha dehe maksudNia mandok, 'Jalahanmunu ma Au tapi nada dapot hamu Au,' dohot, 'Nada tarbaen hamu ro tu ingananKi?' " **37** Ari na parpudi di pesta i, i ma mata ni pesta i. Jongjong ma Jesus disi mandok hata marsora na gogo, ning Ia ma, "Sanga ise na manguas, tu Au ma ro anso minum. **38** Tarsurat do di Buku Na Badia i songon on, 'Sanga ise na porsaya di Au, mabaor do angka batang aek na mangalehen ngolu sian bagasan rohana.' " **39** (Tondi Ni Debata do na nidok ni Jesus disi, i ma na giotsijagiton ni angka na porsaya tuSia. Harana nada podo ro Tondi Parbadia i, hara ni na so dipasangap dope Jesus.) **40** Bahat do halak na manangihon sanga aha na nidok ni Jesus. Jadi adong do sian halahi na mandok, "Na tutu do Ia panurirang!" **41** Adong muse na asing na mandok, "On ma Kristus i!" Tapi laing adong muse do na mandok, "Dia ma he sian Galilea haroro ni Kristus i. **42** Harana di Buku Na Badia i tarsurat, sian pomparan ni si Daud do Kristus i jana sorang di Betlehem, i ma Kota Ni si Daud i." **43** Ujungna gabe martongkari ma halak na bahat i taringot tu Jesus. **44** Adong ma na giot manangkup Ia tapi sahalak pe nada adong na puluk manjamaSa. **45**

Dung i mulak ma angka panjago ni Bagas Ni Debata na nisuru manangkup Jesus, mandapotkon angka sintua ni malim dohot halak Parise. Disapai angka sintua ni malim dohot angka Parise i ma tu angka panjago i, "Biasi inda dioban hamu Ia tuson?" **46** Dialusi angka panjago i ma tu halahi, "Nada adong dope pangkatai ni jolma songon i!" **47** "Adong he na dung tarpaoto-oto muse dohot hamu?" ninna halak Parise i. **48** "Adong dehe sada halak sian angka pamimpin sanga halak Parise na dung porsaya tuSia? **49** Tapi anggo halak na bahat na so umboto angka Tona Ni si Musa, hona bura ma halahi." **50** Sahalak sian angka Parise i madung unjung kehe mandapotkon Jesus borngin-borngin; si Nikodemus goarna. Didok si Nikodemus on ma tu angka Parise na asing i, **51** "Anggo mangihutkon Tona i nada tola hita manguhum-uhumi halak, anggo so jolo nibege dope parkarona, jana anggo so jolo dipareso sanga aha na nibaenNia." **52** "Adong he na halak Galilea ho? Pareso jolo di Buku Na Badia i. Nada adong panurirang na ro sian \*NADA ADONG PANURIRANG NA RO SIAN: Sada naskah narobi mandok: Panurirang indangkon na ro sian.\* Galilea!" **53** Dung i mulak be ma halahi sudena tu bagasna.

**8:1** Tapi anggo Jesus kehe tu Dolok Zetun do Ia. **2** Ancogotna i manyogot dope, kehe ma Ia mangulahi tu Bagas Ni Debata, jana bahat ma marroan halak mandapotkon Ia. Dung i juguk ma Ia, dipungka Ia ma mangajari halahi. **3** Jadi laing di hatiha i marroan ma angka Siboto Surat dohot angka Parise maroban tuSia sada anak boru na tardapot markamainan. Dipajongjong halahi ma anak boru i di tonga-tonga, **4** jana didok halahi ma tu Jesus, "Na tardapot do Rabbi anak boru on markamainan. **5** Anggo di Tona Ni si Musa, adong do Tona na mandok angkon nidangguran do dohot batu dadaboru sisongon on lopus mate. Saonnari bia do pandapotMu?" **6** Disapai halahi pe songon i na giot padapotkon hasalaan ni Jesus do halahi. Tapi dipaunduk Jesus do jana disurat Ia tano i dohot jari-jariNia. **7** Tapi dung sai disosak halahi, dipadorgak Ia ma uluNia jana didok Ia ma tu halahi, "Sanga ise na so mardosa sian hamu, padiar ma ia parjolo mandanggur anak boru on dohot batu." **8** Dung i dipaunduk Jesus ma jana

disurati Ia tano i mangulahi. **9** Dung dibege halahi songon i pandok ni Jesus, morot ma halahi sian inganan i kehe-kehe sada mamungka sian na tumobang. Ujungna tinggal ma Jesus sajo disi dohot anak boru i na laing jongjong disi. **10** Dung i jongjong ma Jesus, didok Ia ma tu anak boru i, "Ma di dia halahi sude? Nada he adong na manguhumi ho nangkin?" **11** "Nada adong, Tuhan" ning ia mangalusi. Didok Jesus ma, "Antong denggan, Au pe nada Huuhumi ho. Kehe ma ho saonnari, ulang be datdati na mardosa tu pudi on." **12** Didok Jesus dope mangulahi tu halahi, "Au do sinondang ni portibi on. Dapotan sinondang hangoluan do sanga ise na mangihutkon Au. Nada be mardalan di na golap halahi." **13** Didok halak Parise i ma tu Jesus, "Saonnari Ho do na manyaksihon diriMu sandiri, nada tutu na nisaksihonMi!" **14** Dialusi Jesus ma, "Haru pe Husaksihon taringot tu diringKu sandiri, tutu do na Husaksihon i; angke Huboto do sanga sian dia Au ro jana tu dia Au kehe. Anggo hamu nada diboto hamu sanga sian dia Au ro jana tu dia Au kehe. **15** Diumi hamu do halak mangihutkon pambaen ni jolma; anggo Au nada adong sahalak pe na Huuhumi. **16** Tapi sugari pe adong halak na Huuhumi, tigor do haputusanKu, harana nada hum Au sandiri, rap do Au dohot Damang i na marsuru Au. **17** Tarsurat do di angka Tona i songon on: Na tutu do na ni saksian ni dua halak. **18** Adong do dua na mangalehen hasaksian taringot tu diringKu Au dohot Damang na marsuru Au." **19** "Di dia ma AmangMi?" ning halahi. Dialusi Jesus ma, "So na ditanda hamu Au. Damang pe nada ditanda hamu i. Sugari ditanda hamu Au, laing ditanda hamu do Damang." **20** Sudena i didok Jesus, hatiha mangajari Ia di Bagas Ni Debata di lambung ni poti hepeng. Tapi sahalak pe nada adong na manangkup Ia, angke nada podo dapot hatihana. **21** Didok Jesus dope tu halahi, "Kehe ma Au jana jalahanmunu ma Au, tapi mate ma hamu di bagasan dosamunu. Tu inganan hakeheanKu, nada tarbaen hamu ro tusi." **22** Dung i didok angka parkuas ni Jahudi i ma, "AropKu na giot manyingkot ma Ia, harana didok Ia, 'Tu inganan hakeheanKu nada tarbaen hamu ro tusi.'" **23** Dung i didok Jesus ma tu halahi, "Sian toru on do hamu ro; tapi anggo Au sian ginjang do. Hamu sian portibi on do; tapi anggo Au nada sian portibi on. **24** Hara ni i do umbaen na Hudok tu hamu, angkon

mate hamu di bagasan angka dosamunu. Jana tutu do i angkon mate hamu di bagasan angka dosamunu, anggo laing na so porsaya hamu, 'Au do ibana.'" **25** "Ise do Ho satutuna?" ninna halahi manyapai. Dialusi Jesus ma, "Aha dope gunana mangkobari Au dohot hamu! \*AHA DOPE GUNANA MANGKOBARI AU DOHOT HAMU: Sanga: Songon na dung Hudokkon tu hamu sian mulana.\* **26** Bahat dope na giot dokkononKu dohot uhumanKu taringot tu hamu. Tapi Hum na Hubege sian na marsuru Au, i sajo do paboanKu tu portibi on -- harana sintong do Ia." **27** Nada diboto halahi, taringot tu Ama i do na nihatahonNia. **28** Jadi didokkon Jesus ma tu halahi, "Dung dipatuginjang hamu sanoli on Anak Ni Jolma i, botoonmunu ma disi, 'Au do' na nidok ni surat i. Disi pe anso tangkas diboto hamu na so adong sada pe na Hubaen i sian roha-rohangKu sandiri. Sanga aha na niajarkon ni Damang tu Au, hum i sajo do na Huhatahon. **29** Jana na marsuru Au, sai rap do Ia dohot Au. Nada jungada dipadiar Ia sasada Au sajo, angke sai Hubaen do sanga aha na pasonangkon rohaNia." **30** Dung didokkon Jesus sudena i, bahat ma halak porsaya tuSia. **31** Dung i didokkon Jesus ma tu halak Jahudi na dung porsaya tuSia, "Anggo burju hamu mandalankon angka ajaranKi, i pe anso tutu hamu gabe siihutkon Au. **32** Botoonmunu ma hasintongan i jana paluaon ni hasintongan i ma hamu." **33** Ninna halahi ma, "Pomparan ni si Abraham do hami. Nada jungada dope hami gabe hatoban ni sanga ise pe! Aha do maksudmu umbaen didok Ho, 'Paluaon ma hamu?' " **34** Dialusi Jesus ma, "Tutu do na Hudok di hamu. Sude halak na mambaen dosa, i ma da hatoban ni dosa. **35** Muda adong sada hatoban di bagas, nada tongtong ia tinggal di bagas i, tapi anggo anak tongtong do tinggal di bagas i. **36** Muda dibaen Anak i hamu malua, i pe anso tutu hamu na malua. **37** Huboto do, pomparan ni si Abraham do nian hamu. Hape laing giot dibunu hamu do Au, hara ni na so ra hamu manjagit pangajaranKi. **38** Na nipatidahon ni Damang tu Au, i do na Huhatahon; jana hamu pe dibaen hamu do sanga aha na nisuruhon ni amangmunu sibaenonmunu." **39** Dialusi halahi ma, "Si Abraham do ompunami." Didok Jesus ma, "Anggo na tutu ma hamu pomparan ni si Abraham, tontu baenonmunu do sanga aha na nibaen ni si Abraham. **40** Hasintongan na Hubege sian Debata, hum i sajo do na Hupaboa tu hamu,

hape mur giot bunuonmunu dope Au. Anggo si Abraham nada dibaen ia songon i! **41** Na nibaen ni amangmunu; i do na nibaenmunu." Dialusi halak Jahudi i ma, "Nada anak gampang hami. Hum sada do Amangnami, i ma Debata sandiri." **42** Dung i didok Jesus ma tu halahi, "Sugari na tutu Debata Amangmunu, angkon holong do rohamunu tu Au, harana, tutu do Au na ro sian Debata. Nada sian roha-rohangKu umbaen na ro Au. Na nisuruNia do Au. **43** Hara ni aha dehe umbaen na so diastui hamu na Hudok i? Angke nada tahan hamu umbege pangajaranKi. **44** Angka anak ni Sibolis do hamu. Jadi hagiort ni amangmunu do na nijalahanmunu. Sian mula-mulana do Sibolis i sibunu jolma. Nada mangolu dibagasan hatutuan ia, harana nada adong disia hatutuan. Pargabus do Sibolis, angke songon i hian do bako ni i. Tutu do pargabus Sibolis i, ia do ama ni sandok gabus. **45** Tapi hara ni na Hupaboa tu hamu taringot tu Debata, hara ni i muse ma umbaen na so porsaya hamu tu Au. **46** Ise ma sian hamu na tarbaen mambuktihon paboa na adong dosa di Au? Muda hupaboa tu hamu taringot tu Debata, biasi inda porsaya hamu tu Au? **47** Sanga ise na ro sian Debata ditangihon Ia do na nidok ni Debata. Tapi anggo hamu nada sian Debata hamu, hara ni i ma umbaen na so ra hamu manangihon i." **48** Dialusi halak Jahudi i ma, "Nada he tutu do muda hami dokkon halak Samaria do Ho, jana na nisonggopan ni setan?" **49** Dialusi Jesus ma, "Nada na nisonggopan ni setan Au! Na pasangapkon Damang do Au, hape nada dipasangap hamu Au. **50** Nada manjalahi sangap tu diringKu sandiri Au. Adong do Sada na manjalahisa jana Ia do na manguhumi. **51** Tutu do na Hudok tu hamu; sanga ise na mangoloi na Hudok, nada mate be Ia salolot-lolotna." **52** Dung i didok angka halak Jahudi i ma tu Jesus, "Saonnari pe anso tangkas sajo di hami, na nisonggopan ni setan do Ho! Si Abraham sandiri madung mate, songon i muse angka panurirang i. Hape didok Ho dope, 'Sanga ise na mangoloi hatangKu, nada mate halahi salolot-lolotna.' **53** Madung mate angka panurirang. Dohot ise ma patudosonMu diriMu? Adong he gumodang Ho ulang pado amanami si Abraham na dung mate?" **54** Dialusi Jesus ma, "Sugari Au mamuji diringKu sandiri, na so adong do arti ni pujianKi. Damang do na mamuji Au; jana didok hamu, Damang i do Debatamunu, **55** hape so ditanda hamu



Ia. Tapi anggo Au Hutanda do Ia. Jadi muda Hudok na so Hutanda Ia, gabe pargabus ma Au songon hamu. Hutanda do Ia jana Huoloi do na nidokNia. **56** Na jopan do roha ni si Abraham amangmunu i laho marnida aringKu. Madung diida Ia i jana jop rohaNia!" **57** Dung i didok halak Jahudi i ma tu Jesus, "So tuk dope lima pulu taon umurMu, na niidaMu ma lakna si Abraham?" \*NA NIIDAMU MA LAKNA SI ABRAHAM?:Dipiga-piga naskah narobi didok: Jungada ma he diida si Abraham Ho?\*" **58** Dialusi Jesus ma, "Tutu do na Hudok di hamu: Dompok so sorang dope si Abraham, madung adong hian Au." **59** Dung i dibuat angka halak Jahudi i ma batu giot mandanggur Jesus; tapi martabuni ma Jesus, lalu kehe Ia morot sian Bagas Ni Debata i.

**9:1** Di na mamolus Jesus, diida Ia ma sada halak na so marnida, na mapitung mamungka sian hatutubuna. **2** Disapai angka siseanNia i ma tu Jesus, "Ale Guru, ise do na mardosa, bayo on do sanga simatobangna, dibaen na mapitung ia sorang?" **3** Dialusi Jesus ma, "Mapitung pe ia nada hara ni na mardosa ia jana nada hara ni na mardosa simatobangnia. Mapitung pe ia anso diida halak do kuaso ni Debata markarejo di bagasan dirinia. **4** Salolot torang dope ari, angkon pupuonta do mangkarejohon karejo ni na marsuru Au. Angke potang ne ma ari jana nada tarbaen sanga ise be markarejo dung di hatiha i. **5** Salolot di tano on Au, Au do sinondang ni portibi on." **6** Dung didokkon Jesus songon i, marsitijur ma Ia tu tano, jana diluntak Ia ma tano i tu tijurNia. Dung i didaiskon Ia ma bustak i tu mata ni bayo i, **7** jana didok Jesus ma tusia, "Kehe ma ho marsuap tu tobat Siloam." (Siloam astuanna "Na nisuru".) Jadi kehe ma bayo i marsuap paiaskon bohinia. Di na mulak ia marnida ma matania i. **8** Sude hombar bagasnia dohot sude halak na marnida ia mangido-ido mandok, "Na he bayo on do na somal i juguk mangido-ido?" **9** Adong na mandok, "Ia ma da i." Tapi adong muse ma na mandok, "Nada na satompa dohot ia do i." Tapi didok bayo i sandiri ma, "Au ma da i," ning ia. **10** "Na tarbia do umbaen na gabe marnida matami?" ninna halahi manyapai ia. **11** Dialusi ia ma, "Bayo na margoar Jesus i, dibaen Ia saotik bustak di tano i, dung i didaiskon Ia ma bustak i tu matanku jana ning Ia ma, 'Kehe ma ho

marsuap tu tobat Siloam.' Jadi kehe au. Jana disi marsuap au, marnida ma matangkun," ning ia. **12** "Di dia ma halakna i?" ning halahi manyapai. "Inda huboto," ning ia mangalusi. **13** Dung i dioban ma bayo i tu jolo ni halak Parise. **14** Hatiha na mambaen bustak i Jesus dohot tijurNia laho mambaen marnida mata ni na mapitung i topet do hatiha i Ari Sabat. **15** Jadi disapai angka halak Parise ma bayo i sanga bia dalanna umbaen na gabe marnida matania. Dialusi bayo i ma, "Diapuskon Ia bustak tu matanku, dung i kehe au marsuap paiaskon matangki, gabe marnida ma au." **16** Adong ma deba sian halak Parise i na mandok, "Nada sian Debata asal ni Bayo na mambaen i, harana dilanggar Ia do tona ni ugamo taringot tu Ari Sabat." Tapi didok halak na asing ma, "Dia ma tarbaen halak pardosa patupa angka hahomangan sisongon i?" Paasing-asing pandapot ma halahi. **17** Jadi hara ni i disapai halak Parise i ma sanoli nari tu bayo i, "Didok ho nangkin, Ia do na mambaen marnida matamu, antong bia do pandapotmu taringot tuSia?" "Panurirang do Ia!" ning ia mangalusi. **18** Tapi laing nada porsaya angka parkuaso ni halak Jahudi i na mapitung hian ia, hape saonnari madung gabe marnida. Nada porsaya halahi anggo so jolo dipiohon halahi simatobangna, **19** jana disapai halahi ma, "Tutu dehe na sorang mapitung anakmon? Na bia do umbaen na gabe marnida ia saonnari?" **20** Dialusi simatobangna i ma, "Anaknami ma da on; jana mapitung do on sian mamungka sorang. **21** Tapi anggo taringot tu na gabe marnida ia saonnari, sanga tarbia dalan ni i nada hami boto. Jana sanga ise na mambaen gabe marnida matania i, i pe nada hami boto. Tusia ma sapai hamu. Madung tuk umurnia; madung tola ia mangalusi sandiri." **22** Hara ni na mabiar do simatobang ni bayo i mida angka parkuaso ni halak Jahudi i umbaen na songon i didok halahi; harana madung putus tahi ni angka parkuaso ni Jahudi i, pakaruaron ma sian bagas paribadatan sanga ise na mangoku Ia Kristus i. **23** Hara ni i ma umbaen didok simatobang ni bayo i, "Nada dakdanak be ia; tusia ma sapai hamu." **24** Dung i dipiohon halahi ma mangulahi na sorang mapitung i hian, jana didok halahi ma tusia, "Oku ma di jolo ni Debata paboa ma dohot tigor, angke hami boto pardosa do Bayo i." **25** Didok ia ma, "Sanga pardosa sanga inda, nada huboto i. Tapi sada do na huboto: Na mapitung humani do au, saonnari madung marnida

au." **26** Dung i didok halahi ma mangulahi tusia, "Bia dibaen Ia tu ho? Bia pambaenNia gabe marnida matamu?" **27** Dialusi bayo i ma, "Madung hupaboa di hamu, hape so ra hamu manangihon. Biasi dope disapai hamu i? Adong he na giot siihutkon Ia muse ma hamu?" **28** Dung i muruk ma halahi tusia ninna halahi ma, "Ho do sisean ni i; anggo hami nada! Sisean ni si Musa do anggo hami. **29** Anggo taringot tu si Musa tangkas do hami boto na dung mangkatai Debata tusia. Tapi taringot tu Bayo i nada hami boto sanga sian dia asal ni i." **30** Dialusi bayo i ma, "Hahomangan noma i anggo so diboto hamu be sanga sian dia asal ni Bayo i, hape madung marnida matangku dibaen Ia. **31** Taboto do, na so ditangihon Debata do anggo pardosa. Hum halak na pasangap Debata dohot na patuluskon hagiotaNia sajo do na nitangihon ni Debata. **32** Sian parmulaan ni tano on nada unjung dope tarbege adong halak tarbaensa jolma na sorang mapitung gabe marnida. **33** Anggo na so sian Debata do Bayo i, nada tarbaen Ia sanga aha na songon i." **34** Dialusi halahi ma, "Himpal do ho halak pardosa mamungka sian ujung ni obukmu lopus tu palampak ni patmu sian hasosorangmu, giot ajaranmu ma he hami?" Dung i dipakaruar halahi ma ia sian bagas paribadatan i. **35** Dibege Jesus ma na dung dipakaruar halahi bayo i sian bagas paribadatan. Jadi dung marsuo dohot bayo i didok Jesus ma tusia, "Porsaya dehe ho tu Anak Ni Jolma i?" **36** Dialusi bayo i ma, "Ise dehe i Tuhan? Laing paboa ma jolo tu au anso laing porsaya au tuSia!" **37** Dialusi Jesus ma, "Madung diida ho Ia. Na manghatai dohot ho saonnari, i ma Ia." **38** "Porsaya do au Tuhan!" ninna bayo i, dung i manungkap ma ia marsomba di jolo ni Jesus. **39** Didok Jesus ma, "Laho mandalankon uhum do umbaen na ro Au tu portibi on; anso marnida angka na mapitung jana halak na marnida gabe mapitung." **40** Jadi dibege halak Parise na adong disi do na nidok ni Jesus songon i, gabe didok halahi ma tuSia, "Na didok rohaMu do na mapitung hami on?" **41** Dialusi Jesus ma, "Anggo sugari mapitung hamu, so na mardosa hamu. Tapi hara ni na nidokmunu i, 'Marnida do hami,' i ma patandahon laing na mardosa hamu."

**10:1** "Tutu situtu do na Hudok on tu hamu: Sanga ise na masuk tu bara ni biri-biri i nada sian pintu, sipanangko do i jana panyamun. **2** Tapi anggo na

masuk sian pintu, i ma parmahan ni biri-biri i. **3** Jadi diungkap panjago i ma pintu i tu parmahan i, jana ditangihon angka biri-biri i ma sora ni parmahan i di na nipiohonnia angka biri-birinia i hombar tu goar-goarna be; dung i dioban ia ma halahi tu ruar. **4** Dung dioban ia angka biri-biri i tu ruar, di jolo ma mardalan parmahan i, jana mangihut ma angka biri-birinia i sian pudinia harana ditanda halahi do sorania. **5** Nada ra be halahi mangihut tu halak na asing, marlojong do halahi kehe manadingkon halak na asing, harana nada ditanda halahi sorana i." **6** Nada diastui angka halak na umbegean i sanga aha astuan ni umpama na nidok ni Jesus i. **7** Didok Jesus ma mangulahi, "Tutu do na Hudokkon tu hamu: 'Au do pintu di biri-biri i. **8** Sude halak na parjolo sian Au, panangko do i jana panyamun, jana nada ditangihon angka biri-biri i sora ni i. **9** Au do pintu i. Sanga ise na masuk sian Au, dapotan haluaan; dapotan jampalan ma i muda masuk sanga karuar.' **10** Anggo panangko, na giot manangko sajo do i muda ro, mamatehon dohot manyegohon. Tapi anggo Au muda ro, anso marhangoluan do halahi -- i ma hangoluan na marlobi-lobi." **11** "Au do parmahan na denggan. Rade do mate anggo parmahan na denggan manghopkop biri-birina. **12** Anggo parkarejo na mangomo, nada parmahan i, jana nada ia nampuna angka biri-biri i. Muda diida ia sorigala, marlojong ma ia manadingkon angka biri-biri i, lopus disoroi sorigala i angka biri-biri i jana marsitondong dalanna be. **13** Marlojong do parkarejo na niupaan i, angke hara ni na niupaan do ia antong umbaen na karejo; nada dipardulihon ia anggo biri-biri i. **14** Au do parmahan na denggan. Hutanda do angka biri-biringKu jana ditanda halahi do Au, **15** songon Damang na mananda Au jana Au mananda Damang. Jana Hulehen do hosangKu humopkop biri-biringKi. **16** Adong dope angka biri-biri na asing laing Au nampunasa, tapi nada sabara dohot angka biri-biri on. Halahi pe angkon obanonKu do jana laing tangihonon ni halahi do sorangKu. Sudena halahi angkon gabe \*SUDENA HALAHI ANGKON GABE: Dipiga-piga-piga naskah narobi didok: Jadi giot adong ma.\* sapunguan jana sada parmahan." **17** "Holong do roha ni Damang tu Au hara ni haradeonKu mangalehen hosangKu, anso jagitonKu i mangulahi. **18** Nada tarbaen sanga ise pe mangarampas hosangKu sian Au. Na rade hian do Au

mangalehen hosangKi. Guru di Au do mangalehen i jana marguru di Au do muse laho manjagitsa mangulahi. Jana i ma na nisuruhon ni Debata sibaenonKu." **19** Hara ni na nidok ni Jesus songon i gabe martongkari ma halak Jahudi i. **20** Bahat na mandok, "Na sibolison do i! Na rintik do i! Biasi dipatangi-tangi hamu i?" ning halahi. **21** Tapi adong muse do na mandok, "Anggo halak na hona setan, dia ma tarhatahon Ia na songon i! Dia ma tarbaen setan halak na mapitung gabe marnida?" **22** Marpesta Parningotan Pangompoion Bagas Ni Debata ma halak di Jerusalem. Hatiha musim ngali ma disi. **23** Mardalan-dalan ma Jesus di Emper Ni Si Salomo na di Bagas Ni Debata; **24** dirongomi angka parkuaso ni halak Jahudi ma Jesus disi. Ninna halahi ma tuSia, "Sadia honok nari sai paganguon ni Guru i rohanami? Tangkas ma didokkon Guru i muda na Ho do Kristus i." **25** Dialusi Jesus ma, "Madung Hudok di hamu, hape laing nada porsaya hamu. Sude angka karejo na Hukarejohon markite-hite goar ni Damang do i, angka karejongKi ma na manyaksihon taringot tu Au. **26** Dibaen nada biri-biringKu hamu, hara ni i nada porsaya hamu. **27** Ditangihon biri-biringKu do sorangKu. Hutanda do halahi jana diihutkon halahi do Au. **28** Hulehen do di halahi hangoluan na so ra mantak. Bagi na bia pe nada mate halahi, jana nada tarrampas sanga ise pe halahi sian parmahanionKu. **29** Gumodangan dope Damang na mangalehen halahi di Au \*GUMODANGAN DOPE DAMANG NA MANGALEHEN HALAHI DI AU: Dipiga-piga naskah narobi didok: Aha na dung dilehen ni Damang di Au, gumodang dope sian.\* sian sasudena. Jana nada tarrampas sanga ise pe halahi sian parmahanion ni Damang. **30** Sada do Au dohot Damang." **31** Dung i dibuat angka parkuaso ni Jahudi i ma mangulahi batu laho mandanggur Jesus. **32** Tapi didok Jesus ma tu halahi, "Madung diida hamu Au mambaen angka karejo na denggan, na nisuruhon ni Damang karejohononKu; sian sude parkarejoan i, hara ni karejo na dia ma umbaen giot dangguranmunu Au?" **33** Dialusi angka parkuaso i ma, "Umbaen na giot danggurannami Ho, nada hara ni angka karejoMu na denggan i, tapi hara ni na nipabileMu do Debata! Jolma humani do Ho antong hape dioku Ho diriMu songon Debata!" **34** Dung i didok Jesus ma mangalusi, "Inda he tarsurat di Buku Tona i: Madung Hudok, 'Angka

debata do hamu'? **35** Jana sude hita rap taoku do anggo na tarsurat di Buku Na Badia i, nada tarbaen sundat i. Antong anggo songon i, muda tu angka na manjagit hata ni Debata i, digoari Debata sandiri halahi angka debata, **36** biasi didok hamu na mangincahi Debata hara ni na Hudok Au Anak Ni Debata? Hape nian na diparbadaiai ni Ama i do Au jana na nisuruNia tu portibi on? **37** Sugari na so Hukarejohon karejo ni Damang, padiar ma indangkon sai porsaya hamu tu Au. **38** Tapi muda Hukarejohon karejo ni Damang, haru pe nada porsaya hamu tu Au, saotik-otikna angkon haporsayaanmunu ma nian na Hubaen i, anso diboto jana diastui hamu na sada do Damang dohot Au, jana Au sada dohot Damang." **39** Giot ditangkup halahi ma Ia tapi malua do Ia sian tangan ni halahi. **40** Mangulahi ma Jesus kehe tu ipar ni Batang aek Jordan, i ma inganan ni si Johannes na salpu i mandidihon halak, jana disi ma Ia jolo tinggal. **41** Marroan ma bahat halak mandapotkon Ia. Didok halahi ma, "Nada nian mambaen tanda hahomangan si Johannes, tapi tutu do sude na nidok ni si Johannes taringot tu Bayo on." **42** Jadi bahat ma disi halak porsaya tu Jesus.

**11:1** Adong ma sada halak na marnyae, si Lasarus goarna. Di Betania do ia maringanan, i ma kota ni si Maria dohot si Marta na martinadohon i. **2** (Si Maria ma halakna na manduruskon miak na huskus i tu patni Tuhan i jana mangapusina dohot obuknia. Ibotonia ma si Lasarus na marnyae i.) **3** Ditonahon halahi na dua ma barita i tu Jesus, ninna halahi ma di tona i, "Tuhan, marnyae do donganMu haholongan ni rohaMi." **4** Dung dibege Jesus barita i didok Ia ma, "Nada pola mate ia baenon ni nyae i. Anso marsangap do Debata umbaen na marnyae si Lasarus; anso laing dohot muse ma dipasangap Anak Ni Debata." **5** Tutu do, holong do roha ni Jesus mida si Marta dohot anggina i songon i tu si Lasarus. **6** Tapi haru pe na dung lalu tu Jesus barita na paboahon marnyae si Lasarus, disangajo Ia dope dua ari nari laing di inganan i. **7** Dung dua ari pe anso didokkon Ia tu angka siseanNia i, "Beta ma hita mulak tu Judea." **8** Dialusi angka siseanNia i ma, "Baru dope, na giot didangguri ni halak Jahudi i Guru i dohot batu, hape saonnari giot mangulahi ma Guru i tusi?" **9** "Nada he dua

bolas jom do sadari?" ninna Jesus. "Anggo arian do halak mardalan nada tartuktuk bagi na tu aha, harana torang do diida ia tano on. **10** Tapi muda borngin do halahi mardalan, tartuktuk ma ia, angke nada adong na torang disia." **11** Songon i ma pandok ni Jesus. Dung i didok Ia muse dope tehe, "Madung modom si Lasarus donganta i, tapi kehe ma Au manyungguli ia." **12** Didok angka sisean ni Jesus i ma, "Muda tarpodom do si Lasarus Tuhan, na giot malum ma i." **13** Hape anggo na nidok ni Jesus paboa na dung mate do si Lasarus. Tapi ninna roha ni halahi, na tutu do tarpodom si Lasarus anggo maksud ni Jesus. **14** Jadi torus torang ma dipaboa Jesus, "Madung mate si Lasarus. **15** Tapi hara ni na porlu tu hamu sude, gabe jop do rohangKu nada disia Au, anso porsaya hamu. Beta ma tadapotkon si Lasarus." **16** Didok si Tomas na nigoaran muse "si Linduat" ma tu angka dongannia sisean i, "Beta ma laing dohot hita anso rap mate hita dohot ia!" **17** Dung lalu Jesus disia, ma opat ari si Lasarus ditanom. **18** Nada jabat tolu kilometer dao ni Betania sian Jerusalem. **19** Bahat do halak Jahudi marroan manopot si Maria dohot si Marta laho mangapoi halahi hara ni parmonding ni si Lasarus ibotona i. **20** Dung dibege si Marta na ro Jesus, haruar ma ia mangalo-alo Jesus, tapi anggo si Maria di bagas do ia. **21** Dung i didok si Marta ma tu Jesus, "Sugari dison Ho Tuhan dompak so mate ibotongki, tontu nada tulus ia mate! **22** Tapi haru pe songon i huboto do, sanga aha na nipangidoMu tu Debata, sai na lehenon ni Debata do i di Ho." **23** "Mulak mangolu do ibotomi mangulahi," ninna Jesus tu si Marta. **24** Dialusi si Marta ma, "Huboto do i angkon mulak mangolu si Lasarus dung disungguli angka na mate i di Ari Parpudi." **25** Dialusi Jesus ma, "Au do hangongot dohot hangoluan. Laing mangolu do sanga ise na porsaya tu Au haru pe na dung mate ia. **26** Halak na mangolu jana na porsaya tu Au, nada mate be ia salolot-lolotna. Porsaya dehe ho disia?" **27** Dialusi si Marta ma, "Olo Tuhan, porsaya do au Kristus i do Ho, Anak Ni Debata na ro tu portibi on." **28** Dung didok si Marta songon i, kehe ma ia marpio si Maria angginia i jana dihusipkon ia ma, "Madung dison Guru i, dipiohon Ia do ho." **29** Umbege i manigor diompoti si Maria ma jongjong, bulus mandapotkon Jesus. **30** (Inda podo masuk Jesus hatiha i tu huta i. Laing di ingananparsuoanNia dohot si Marta nangkina dope Ia.) **31** Diida halak

Jahudi na marjuguhan na mangapoi si Maria di bagas i ma si Maria jongjong mopop tu ruar, gabe diihutkon halahi ma ia, harana diambang halahi na giot kehe tu kuburan do ia giot mangandungi disi. **32** Dung lalu si Maria tu inganan ni Jesus jana diida ia ma Jesus, marsinggang ma ia di jolo ni Jesus mandok, "O Tuhan, sugari dison Tuhan i, nada jabat mate ibotongki!" **33** Dung diida Jesus tangis si Maria jana dohot muse ma halak Jahudi na marroan i dohot si Maria tangis muse, gabe marsak jana ibo sajo ma roha ni Jesus. **34** Dung i disapai Ia ma tu halahi, "Di dia ditanom hamu ia?" "Beta ma taligi Tuhan," ning halahi. **35** Dung i tangis ma Jesus. **36** Gabe didok halak Jahudi i ma, "Ligi ma, holong ni rohaNia i tu si Lasarus!" **37** Tapi adong muse do sian halahi na mandok, "Madung dibaen Ia gabe marnida na mapitung, biasi nada haantahan Ia anso ulang mate si Lasarus?" **38** Di bagasan arsak dohot ibo ni roha, kehe ma Jesus tu kuburan i. Songon liang na ditutup dohot batu na godang do kuburan i. **39** "Paorot hamu ma batu i," ninna Jesus. Dialusi si Marta iboto ni na mate i ma, "Tapi ma adong opat ari Tuhan dung ditanom ia. Ma bau i Tuhan!" **40** Didok Jesus ma tu si Marta, "Na he madung Hudok tu ho: Anggo porsaya ho, idaonmu do hasangapan ni Debata!" **41** Dung i dipaorot halahi ma batu i. Jadi manatap ma Jesus tu langit jana didok Ia ma, "Tarimakasi ma Hudok tu Ho Amang hara ni na nitangihonMu pangidoanKu. **42** Huboto do na sai tongtong ditangihon Ho pangidoanKu, tapi Hudok pe songon i hara ni angka jolma na dison on do; anso porsaya halahi, na Ho do marsuru Au." **43** Dung didok Jesus songon i, dipagogo Ia ma soraNia pio-pio, "Haruar ma ho Lasarus!" ning Ia. **44** Dung i haruar ma bayo na dung mate i. Laing bungkus dope tanganna i dohot patna i dibaen kopenna i, jana bohina i pe laing ditutupi kopen panutup ni bohi i dope. "Buka hamu kopenna i," ninna Jesus tu halak na disi i, "jana padalan hamu ma ia." **45** Bahat do halak Jahudi na marroan i manopotkon si Maria gabe porsaya tu Jesus, dung diida halahi na masa i. **46** Tapi adong muse do sian halahi na kehe manguhahi tu halak Parise laho paboahon sanga aha na nibaen ni Jesus i. **47** Jadi hara ni i, dibaen angka halak Parise dohot angka sintua ni malim ma rapot, i ma rapot godang ni ugamo i. Didok halahi ma disi, "Bia noma baenonta? Bahat do dibaen Bayo i hahomangan! **48** Muda



tapadiar-diar do Ia sai songon i, gabe sude ma halak porsaya tusia. Ujungna ro muse ma halak Rom na markuaso i mangaroncohon Bagas Ni Debata dohot sude bangsonta on!" **49** Adong ma sahalak sian halahi si Kayafas goarna, i ma na gabe Malim Godang di na sataon i, ning ia ma, "So adong diboto hamu sanga na aha. **50** Na so diboto hamu do? Gumonanan do mate sada halak humopkop na bahat ulang pado sudena bangso on mago?" **51** Satutuna nada sian pikirannia sandiri didok si Kayafas songon i. Tapi songon Malim Godang do ia di na sataon i, madung songon na nibaennia hian boa-boana na angkon mate Jesus humopkop halak Jahudi. **52** Jana nada hum hara ni halak Jahudi sajo, tapi dohot muse anso dipalagut sudena gabe sada angka dakdanak ni Debata na marsarak i. **53** Jadi mamungka sian ari i, martahi-tahi ma halak Jahudi i laho mamunu Jesus. **54** Hara ni i nada be mardalani Jesus torang di jolo ni halak Jahudi. Ditadingkon Ia ma Judea, kehe ma Ia tu kota na margoar Efraim na donok tu halongonan. Disi ma Ia tinggal rap dohot angka siseanNia i. **55** Jadi hatiha i giot dapot ne ma Pesta Paskah ni halak Jahudi. Ma bahat halak sian angka kota i markehean tu Jerusalem laho paiaskon diri dampak so dapot Pesta Paskah i. **56** Jadi taran di Bagas Ni Debata halahi, dijalak-jalahi halahi ma Jesus. Marsisapa-sapaan ma halahi, ninna halahi ma, "Bia do ninna rohamu, na so ro do Ia ulaning tu pesta on?" **57** Madung diparentahon angka sintua ni malim dohot angka halak Parise, sanga ise na umbotoan di dia Jesus, angkon paboan ni na umbotosa i ma i; anso tarbaen manangkup Jesus.

**12:1** Onom ari nari dampak so Pesta Paskah i, kehe ma Jesus tu Betania. Disi do tinggal ni si Lasarus na dung jungada mate jana na nipangolu ni Jesus manguhahi. **2** Ditamu halahi ma Ia disi, jana dohot ma si Marta mangoloi disi tapi anggo si Lasarus dohot ma ia mangan rap dohot Jesus. **3** Dung i ro ma si Maria maroban hira-hira satonga liter narwastu, i ma miak na lobi huskus jana na arga situtu. Diusehon ia ma miak i tu pat ni Jesus jana diapus ia ma dohot obuknia. Gabe huskus ma sude bagas i hara ni uap ni miak na huskus i. **4** Sahalak sian sisean ni Jesus na margoar si Judas Iskariot, ia ma muse na manghianat tu Jesus mandok, **5** "Biasi ma

he inda nigadis miak na huskus i, arga tolu ratus hepeng perak jana nilehen hepengna i tu halak na pogos?" **6** (Didok si Judas pe songon i nada na mangarohahon halak napogos ia, tapi hara ni na panangko do ia. Madung somal ia mambuati hepeng sian hepeng ni halak na dipasimpankon disia.) **7** Tapi didok Jesus ma, "Padiar ma songon i. Tu ari pananomanku do i dibaen ia. **8** Anggo halak na pogos tongtong do adong di tonga-tongamunu, tapi anggo Au nada tongtong rap dohot hamu." **9** Bahat ma halak Jahudi na umbege, na dung di Betania Jesus. Jadi kehe ma halahi tusi. Umbaen na kehe pe halahi tusi nada hum hara ni Jesus, tapi dohot do muse hara ni na giot mangaligi si Lasarus na dung dipangolu ni Jesus mangulahi. **10** Hara ni i ma dibaen na giot dohot si Lasarus bunuon ni angka sintua ni malim i; **11** angke hara ni ia, gabe bahat halak Jahudi na kehe manadingkon pamimpin ni halahi gabe porsaya muse tu Jesus. **12** Ancogotna i tarbege ma tu halak na bahat na marroan manghagodangkon Paskah i, bahaso na dung di tonga dalan Jesus laho tu Jerusalem. **13** Dung i diparrampingkon halahi ma mare-mare, kehe ma halahi mangalo-alo Jesus. Marsurahi ma halahi, "Hosana! Dipasupasu ma Ia na ro di bagasan goar ni Tuhan, Raja ni Israel!" **14** Jadi adong ma halode na poso dapot Jesus jana dilombut Ia ma i. Laing songon na tarsurat i, **15** "Ulang ho mabiar, ale boru kota Sion! Ligi ma Rajamu ro, mangalombut sada halode jara-jara!" **16** Anggo di hatiha i nada diastui anak sisean ni Jesus i dope taringot tusi. Tapi dung dipasangap Jesus, i ma dung diparsilangkon jana mulak mangolu Ia, baru pe diingot halahi na dung tarsurat songon i di bagasan Buku Na Badia taringot tuSia jana na dung dipatulus halahi songon i tuSia. **17** Anggo angka na midaan Jesus hatiha na mamiohon si Lasarus haruar sian kuburan i jana dipangolu ia mangulahi, sai dipaboa-boa halahi do torus tu angka halak na asing taringot tusi. **18** I do umbaen na marroan halak na bahat i mandapotkon Jesus, harana madung dibege halahi na nibaenNia hahomangan i. **19** Dung i marsipandohonan ma angka halak Parise i ninna halahi ma, "Nada adong gunana ro hita tuson! Ligi hamu ma, ma gabe sude na satano on mangihutkan Ia!" **20** Tapi adong do dohot halak Junani sian angka na manangkok marsomba di ari pesta i. **21** Ditopot halahi ma si Pilipus, ninna halahi ma, "Anggo tarbaen

do sugari, por do rohanami marsuo dohot Jesus." (Sian Betsaida na di Galilea do anggo asal ni si Pilipus.) **22** Dung i kehe ma si Pilipus paboahon i tu si Andreas, gabe rap ma halahi na dua paboahonsa tu Jesus. **23** Dung i didok Jesus ma tu halahi, "Madung dapot hatihana pasangapon Anak Ni Jolma i. **24** Tutu do na Hudok on tu hamu: Muda so nisuan tu tano jana mate same i, laing tinggal sangkibung i sajo do i. Tapi muda mate same i, baru pe anso bahat eme diparbatuhon. **25** Sanga ise na mangkaholongi ngoluna na di tano on, agoan ngolu na so mantak ma halahi. Tapi sanga ise na so mampardulihon ngoluna na di tano on, na mangarade tu hangoluan na so mantak ma halahi. **26** Sanga ise na giot mangoloi Au angkon ihutkononnia do Au; anso sai tongtong rap dohot Au angka na mangoloi Au sanga di dia pe Au. Jana pasangapon ni Damang muse ma sanga ise na mangoloi Au." **27** "Songon na marsak do rohangKu saonnari. Aha do na giot sidohononKu? DohononKu do, 'O Amang ulang ma padiar Au mamolus partinaonan on!' Hape nian laho manaon partinaonan on do umbaen na ro Au. **28** Pasangap ma goarMu da Amang!" Dung i tarbege ma sora sian langit na mandok, "Madung Hupasangap i tapi pasangaponKu dope i mangulahi." **29** Dibege halak na bahat na disi do sora i. Didok halahi ma, "Ronggur do i!" Tapi adong muse do mandok, "Nada! Surusuruan do i mangkobari tuSia!" **30** Dung i didok Jesus ma tu halahi, "Nada hara ni Au umbaen na tarbege sora i, tapi hara ni haporluanmunu do. **31** Saonnari ma hatihana uhuman portibi on; taluhonon ma raja ni portibi on saonnari. **32** Anggo Au muda dung dipatuginjang di ginjang ni tano, tarihonKu ma halak sudena tu Au." **33** Na paboahon pangalaho ni hamateanNia na di parsilangkon i do na nidokNia songon i. **34** Didok halak na bahat i ma tuSia, "Anggo mangihutkon Buku Tona ni ugamonami, salolot-lolotna do mangolu anggo Kristus i. Biasi do didokkon Ho patuginjangon di ginjang tano Anak Ni Jolma i. Ise lakna Anak Ni Jolma i?" **35** Dialusi Jesus ma, "Santongkin nari sajo noma hatiuran i di tonga-tongamunu. Jadi dalani hamu ma sidalananmunu salolot laing adong na torang i anso ulang ditutupi hagolapan i hamu. Sanga ise na mardalan di na golap nada diboto ia sanga na giot tu dia ia kehe. **36** Haporsayai hamu ma hatiuran i salolot laing di hamu i, anso gabe halak ni

hatiuran hamu." Dung didokkon Jesus songon i, morot ma Ia sian i jana nada ra be Ia patidahon diriNa tu halahi. **37** Madung bahat sajo angka hahomangan dibaen Jesus di jolo ni halahi. Tapi haru songon i pe nada porsaya halahi tuSia. **38** Jadi di na songon i tarjadi ma na didok ni Panurirang Jesaya. Songon on ma pandoknia, "O ale Tuhan, ise ma he na porsaya tu jamitanami? Tu ise dope patidahonon kuaso ni Tuhan?" **39** Hara ni i ma umbaen na so tarhaporsayai halahi, angke didok si Jesaya hian do songon on, **40** "Hupapitung do mata ni halahi, jana Hupagolap pikiran ni halahi; lopus nada marnida mata ni halahi, jana nada marbuka pikiran ni halahi. Anso ulang mulak halahi tu Au, gabe Hupamalum halahi muse." **41** Songon i do didok si Jesaya, harana madung diida ia hasangapanNia jana na mangkobari ia taringot tuSia. **42** Tapi haru pe songon i, laing bahat do angka pamimpin ni halak Jahudi i na porsaya tu Jesus. Tapi nada puluk halahi mangoku torang di jolo ni halak; harana mabiar halahi diharuarkon sian bagas paribadatan. **43** Harana holongan do roha ni halahi di hasangapan na sian jolma, ulang pado hasangapan na sian Debata. **44** Dung i didokkon Jesus ma, "Sanga ise na porsaya tu Au, nada hum tu Au porsaya halahi tapi dohot do tu na marsuru Au. **45** Jana sanga ise na marnida Au, diida Ia muse do na marsuru Au. **46** Songon sinondang do Au di na ro tu portibi on, anso sude halak na porsaya tu Au ulang be tinggal di na golap. **47** Sanga ise na manangihon pangajaranKu tapi nada diihutkon Ia nada Au na manguhumisa. Angke nada na giot manguhumi portibi on umbaen na ro Au, tapi na giot paluahon do. **48** Saulahon, adong do na manguhumi sanga ise na so ra manjagit Au jana na so ra patuluskon angka na Hudok. Jamita na Hupalalu i do na gabe panguhum maradopkon halahi di Ari Parpudi. **49** Jana songon i do tutu! Harana Au pe nada jungada Au mandok hata sian roha-rohangKu sandiri; Damang na marsuru Au, Ia do na mamarentahon tu Au sanga aha na angkon dokkononKu jana sanga aha sipabotohononKu. **50** Jana Huboto do na mangalehen hangoluan na so mantak do parentaNia i. Sanga aha na Hudokkon i, na nisuruhon ni Damang do Au mandokkon i."

**13:1** Sadari noma anso Ari Pesta Paskah. Madung diboto Jesus na giot

tadingkononNia ma portibi on jana mulak ma Ia tu AmangNia. Dihaholongi Ia do sudena halak na diSia, na adong di tano on jana lopus tu ujungna pe laing holong do rohaNia di halahi. **2** Mangan ma Jesus dohot angka siseanNia borngin i. Madung disuan Sibolis i tu bagasan roha ni si Judas anak ni si Simon Iskariot roha na giot manghianat tu Jesus.

**\*MADUNG DISUAN SIBOLIS ... TU JESUS:** Sanga: Madung ditontuhon Sibolis hian si Judas anak ni si Simon giot manghianat tu Jesus.\* **3** Diboto Jesus do na dung dipasahat AmangNia sude kuaso tuSia. Jana diboto Ia muse do na ro sian Debata Ia, jana angkon mulak muse Ia tu Debata. **4** Jadi jongjong ma Ia sian meja i, dibuka Ia ma baju jubaNia, dililitkon Ia ma sada anduk di gontingNia. **5** Dung i diusehon Ia ma aek tu sada sambong, dibasu Ia ma pat ni angka siseanNia i jana dipahiang Ia dohot anduk na lilit di gontingNia i. **6** Dung lalu tu si Simon Petrus, didok si Simon Petrus ma, "Na giot mamasu patku do Ho, ale Tuhan?" **7** Dialusi Jesus ma, "Anggo saonnari nada mangarti dope ho sanga aha na Hubaen, tapi botoonmu do i muse." **8** Didok si Petrus ma, "Ulang Tuhan. Bagi na bia pe nada tola ho mamasu patkon!" Tapi didok Jesus ma tusia, "Anggo so Hubasu do patmon, nada tola be ho gabe siseanKu." **9** Dialusi si Simon Petrus ma, "Anggo songon i do Tuhan, ulang ma hum patKu sajo dibasu, tapi dohot ma tanganKu dohot ulungKu!" **10** Didok Jesus ma, "Sanga ise na dung maridi, tontu madung ias ia sude. Nada porlu be nipaias manguhahi; hum patnia **\*HUM PATNIA:** Dipiga-piga-piga naskah narobi nada adong hata on.\* sajo noma i sipaiason. Anggo hamu na dung ias hian do, tapi nada sude hamu." **11** (Madung diboto Jesus hian sanga ise na giot manghianattuSia. I do umbaen na nidokNia, "Anggo hamu na dung ias hian do, tapi nada sude hamu.") **12** Dung sidung dibasu Jesus pat ni halahi sude, dipake Ia ma manguhahi baju jubaNia i, dipajuguk Ia ma tu juguhanNia hian. Dung i didokkon Ia ma tu halahi, "Diboto hamu do sanga aha astuan ni na Hubaen i tu hamu? **13** Digoari hamu do Au Guru dohot Tuhan. Tutu do na nidokmunu i; harana Guru do Au tutu jana Tuhan. **14** Jadi muda Au Tuhan dohot Gurumunu mamasu patmunu, hamu pe angkon marsibasuan pat ni donganna ma hamu. **15** Tiruan do na Hubaen i tu hamu, anso dibaen hamu muse songon na Hubaen i tu hamu. **16** Tutu do na

Hudok on tu hamu: Nada gumodang naposo sian morana; jana nada gumodang suruan sian na marsurusa. **17** Saonnari madung diboto hamu na songon i; jadi muda didalankon hamu songon i, martua situtu ma hamu." **18** "Nada tu hamu sudena na Hudokkon on. Huboto do sanga ise na dung Hupili. Tapi angkon laing tarjadi do sanga aha na tarsurat di Buku Na Badia i; songon on do tarsurat disi, 'Sanga ise na mangan rap dohot Au, i ma ibana na giot mangalo Au.' **19** Jolo Hupaboa hian do i tu hamu saonnari dampak so tarjadi dope, jadi muda dung tarjadi anso porsaya hamu Au do na nidok ni surat i. **20** Tutu do na Hudok on tu hamu: Sanga ise na manjagit suruanKu, na manjagit Au do i. Sanga ise na manjagit Au, Debata na marsuru Au do na nijagitna disi." **21** Dung didok Jesus songon i, marsak sajo ma rohaNia di bagasan. Dung i torus torang ma didok Ia, "Tutu do na Hupaboa on tu hamu: Sahalak sian hamu giot manghianati tu Au." **22** Marsiligian ma angka siseanNia i di bagasan pangkilalaan na so martontu. Nada diboto halahi sanga ise na nidokNia. **23** Tapi adong ma sahalak sisean haholongan ni roha ni Jesus juguk di lambungNia. **24** Jadi dihilap si Simon Petrus ma tusia anso disapai ia tu Jesus sanga ise na nidok ni Jesus. **25** Dung i dipadonok ia ma tu Jesus laho manyapai ning ia ma, "Ise dehe i, Tuhan?" **26** Dialusi Jesus ma, "Sanga tu ise Hulehen roti na Husornomkon on, i ma ibana." Dung i dibuat Jesus ma roti i, disornomkon Ia ma tu mangkuk i; jadi dilehen Ia ma tu si Judas anak ni si Simon Iskariot. **27** Disi dijagit si Judas roti i, manigor susur ma Sibolis i tusia. Dung i didok Jesus ma tusia, "Pasigop ma baen sanga na aha giot baenonmu!" **28** Nada adong na umboto sian halahi na juguk mangan disi, sanga hara ni aha umbaen na didok Jesus songon i tu si Judas. **29** Adong deba na marpikir, na disuru Jesus do si Judas manobusi na porlu tu pesta i sanga betak na nisuru ni Jesus si Judas mangalehen hepeng saotik tu angka na pogos -- harana si Judas do sitiop hepeng kas ni halahi. **30** Dung dijagit si Judas roti i, manigor haruar ma ia. Madung borngin hatiha i. **31** Dung morot si Judas sian i, didok Jesus ma, "Pasangapon ma saonnari Anak Ni Jolma Suruan ni Debata i. Jana nipasangap muse ma Debata markite-hite Ia. **32** Muda dipasangap Debata markite-hite Ia, pasangapon ni Debata muse ma Ia markite-hite diri ni Debata sandiri. Manigor baenon ni Debata

ma songon i. **33** Hamu angka dakdanakKu, nada sadia honok nari be Au rap dohot hamu. Jalahanmunu ma Au, tapi songon na dung Hudokkon i tu halak Jahudi, laing songon i ma dohononKu tu hamu: Nada tarbaen hamu ro tu inganan hakeheanKi. **34** Jagit hamu ma tona na imbaru on sian Au: Angkon marsihaholongan do hamu sama hamu. Songon pangkaholongingKu di hamu, laing songon i ma angkon marsihaholongan hamu. **35** Muda marsihaholongan do hamu, gabe botoon ni halak ma sude, na tutu do anak siseanKu hamu." **36** "O Tuhan, na giot tu dia do Ho Tuhan?" ning si Simon Petrus manyapai Jesus. Didok Jesus ma, "Na giot kehe do Au tu sada inganan, tapi nada tarihutkon ho Au tusi saonnari. Tu pudi on pe ihutkononmu Au." **37** Didok si Petrus ma tuSia, "Biasi nada tarihutkon au Ho saonnari Tuhan? Ra do au mate humopkop Ho Tuhan!" **38** Dialusi Jesus ma, "Tutu ma he na ra ho mate humopkop Au? Tutu do na Hudok on tu ho: Painte so martahuak manuk, ma pola tolu noli diporso ho Au!"

**14:1** Didok Jesus ma, "Ulang pola marsak rohamunu. Porsaya ma hamu tu Debata jana porsaya ma hamu tu Au. **2** Bahat do inganan di bagas ni Damang. Na giot pasingkop ingananmunu do Au kehe tusi. Pola ma Hudok songon i tu hamu, anggo na so tutu do songon i? **3** Dung kehe Au pasingkop inganan i di hamu, mulak pe Au anso laing disi muse ma hamu. **4** Madung diboto hamu do dalan tu inganan na Hutopot i." **5** Dung i didok si Tomas ma tu Jesus, "Nada hami boto Tuhan sanga na giot tu dia Ho kehe, sian dia ma hami boto dalan tusi?" **6** Ninna Jesus ma mangalusi, "Au do dalan i dohot hasintongan dohot hangoluan. Nada adong na tarbaen ro tu Ama i anggo so markite-hite Au. **7** Sugari ditanda hamu Au, tontu laing tandaonmunu muse \*SUGARI DITANDA HAMU AU ... TONTU LAING TANDAONMUNU MUSE: Dipiga-piga naskah narobi didok: Hara ni na dung nitandamunu Au ... tandaonmunu muse.\* ma Damang. Mamungka saonnari madung ditanda hamu Ia, jana madung diida hamu." **8** Dung i didok si Pilipus ma tu Jesus, "Patidahon ma Ama i tu hami Tuhan, anso sombu rohanami," ning Ia. **9** Tapi dialusi Jesus ma, "Sai honok ma Au dung rap dohot hamu sudena, hape laing na so ditanda ho dope Au

Pilipus? Sanga ise na marnida Au, madung diida Ia muse Ama i. Biasi dope didokkon ho, 'Patuduhon ma tu hami Ama i'? **10** O, ale Pilipus! Adong he laing na so porsaya do ho na sada do Au dohot Ama i jana Ama i sada dohot Au? Sudena na Hudok on tu ho nada sian roha-rohangKu sandiri i. Damang na sai maringanan di bagasan Au, Ia do na mangkarejohon i sudena. **11** Porsaya ma hamu di Au, na sada do Au dohot Ama i, jana Ama i dohot Au. Tapi porsaya ma hamu tu Au hara ni sude angka parkarejoan i. **12** Hudok ma tu ho: Satutuna sanga ise na porsaya tu Au, tarbaen ia ma mangkarejohon angka karejo songon na Hupambaeni i, salang na gumodang sian i pe tarbaensa -- angke na kehe mandapotkon Ama i do Au. **13** Jana sanga aha pe na nipangidomunu di bagasan goarKu, baenonKu ma i di hamu, anso nipasangap Ama i markite-hite Anak i. **14** Pangido hamu ma sanga aha sajo markite-hite goarKu; Hupatulus pe i di hamu." **15** "Muda holong rohamunu tu Au, dalankononmunu do angka na Huparentahon. **16** Dung i Hupangido pe tu Ama i, anso dilehen Ia Pangurupi na asing di hamu, na tinggal rap dohot hamu salolot-lolotna, **17** i ma Tondi ni hasintongan. Nada tarjagit portibi on Tondi i, angke nada diida portibi on Ia jana nada ditanda halahi muse. Tapi anggo hamu, ditanda hamu do Tondi i angke rap dohot hamu do Ia tongtong mangolu, jana di bagasan hamu muse do Ia. **18** Nada pola padiaronKu hamu mardangol-dangol. Mulak do Au mandapotkon hamu. **19** Nada sadia honok nari, nada idaon ni portibi on be Au, tapi anggo hamu laing idaonmunu do Au; jana dibaen na mangolu do Au, hamu pe laing mangolu. **20** Di hatiha i tangkas ma botoonmunu, na di bagasan Damang do Au, hamu pe di bagasan Au jana Au di bagasan hamu. **21** Sanga ise na manjagit angka parentangKi jana na mangoloisa, i ma na mangkaholongi Au. Haholongan ni Damang ma sanga ise na mangkaholongi Au. Au pe laing haholonganKu ma halahi, jana patidahononKu ma tu halahi sanga ise Au." **22** Disapai si Judas (tapi nada si Judas Iskariot) ma Jesus, "O Tuhan! Biasi ma hum tu hami dipatangkas Ho diriMu Tuhan, hape tu portibi on nada?" **23** Ninna Jesus ma mangalusi, "Sanga ise na mangkaholongi Au, ihutkononna do angka pangajaranKu. Haholongan ni Damang ma Ia. Ro ma Damang dohot Au sandiri mandapotkon ia jana maringanan ma Hami



rap dohot ia. **24** Sanga ise na so mangkaholongi Au nada ihutkonon ni i angka pangajaranKu. Angka pangajaran na nibegemunu i, nada pangajaranKu i. Tapi pangajaran ni na marsuru Au do i, i ma Damang. **25** Sudena i Hupaboa tu hamu salolot rap dope Au dohot hamu. **26** Tapi Tondi Parbadia i ma na mangajarkon sasudena i tu hamu. Ia do Pangurupi na giot suruhonon ni Ama i markite-hite goarKu. Pangurupi i ma paingotkon tu hamu sasudena na dung Hupaboa i tu hamu. **27** Hasonangan do Hutadingkon di hamu. Hasonangan na sian Au sandiri do na Hulehen tu hamu. Nada songon pangalehen ni portibi on anggo pangalehenKu hasonangan i tu hamu. Ulang pola susa rohamunu; ulang hamu mabiar. **28** Ma dibege hamu Hudok, 'Kehe ma Au, tapi ro do Au mandapotkon hamu mangulahi'. Anggo na holong do rohamunu tu Au, jop do rohamunu di na kehe Au tu Ama i, angke gumodang do Ama i sian Au. **29** Jolo Hupaboa hian do i sudena tu hamu dompak so tarjadi dope, anso porsaya hamu muda dung tarjadi i muse. **30** Nada pola bahat be Au mandok hata tu hamu angke madung ro raja ni portibi on. Tapi nada markuaso i tu Au. **31** Tapi anso diboto portibi on na holong do rohangKu mida Ama i, i do umbaen na Hukarejohon sandok na nisuruhon ni Ama i karejohononKu. I pe, beta ma hita kehe sian on."

**15:1** "Au do bona ni anggur na tutu, jana Damang do parkobun i. **2** Diambungkan Ia do sude rantingKu na so marbatu; jana sude ranting na ramos dipaias Ia do anso mur ramos muse batuna. **3** Madung ias anggo hamu dibaen pangajaran na Hulehen i di hamu. **4** Tinggal ma hamu di bagasan Au, jana Au di bagasan hamu. Anggo ranting, nada tarbaen marbatu sian dirina, anggo so tinggal di bona ni anggur i. Laing songon i do muse hamu muda so tinggal di bagasan Au. **5** Au do bona ni anggur i, jana hamu ma angka rantingna. Sanga ise na tinggal di bagasan Au jana Au di bagasan ia, ramos ma ia marbatu; angke anggo so rap dohot Au, nada adong bagi aha tarbaen hamu. **6** Sanga ise na so tinggal di bagasan Au, ambungkanon ma ia songon ranting i gabe mahiang. Angka ranting na songon i, sipalaguton ma i jana siambungkanon tu bagasan api, anso mosok. **7** Muda tinggal do hamu di bagasan Au jana pangajaranKu pe sai

tinggal di bagasan rohamunu, tola ma pangidoanmunu sanga na aha pe giotmunu; nigohan ma pangidoanmunu i. **8** Muda ramos hamu marbatu, gabe hasangapan ni Ama i do i; songon i ma dalanna baenonmunu patuduhon na tutu situtu hamu siihutkon Au. **9** Huhaholongi do hamu songon pangkaholongi ni Damang tu Au. **10** Muda diihutkon hamu angka parentangKu, mangolu ma hamu sian holong ni rohangKu, laing songon Au na mangolu hara ni holong ni roha ni Damang, angke Huihutkon do na niparentahonNia. **11** Hupaboa pe i sudena tu hamu, anso maringanan do hajojop ni rohangKu di bagasan hamu, jana anso sanggam hajojop ni rohamunu. **12** On ma parentangKi; angkon marsihaholongan do hamu sama hamu, songon pangkaholongingKu di hamu. **13** Nada adong holong na gumodang sian holong ni sahalak na mangalehen hosana humopkop ale-alena. **14** Angka ale-alengKu ma hamu muda dikarejohon hamu sanga aha na Huparentahon tu hamu. **15** Anggo hamu nada Hugoari be naposo, harana anggo naposo nada diboto ia sanga aha na nikarejohon ni morana. Dongan do hamu Hugoari, harana sude na Hubege sian Damang madung Hupaboa tu hamu. **16** Nada hamu mamili Au. Au do na mamili hamu jana Husuru hamu kehe anso ramos hamu marbatu -- i ma parbatu na denggan. Dung i lehenon ni Damang ma di hamu sanga aha pe na nipangidomunu markite-hite goarKu. **17** On ma parentangKi tu hamu: Angkon rap marsihaholongan ma hamu." **18** "Muda dihosomi portibi on hamu, ingot hamu ma, na dung parjolo do Au dihosomi portibi on. **19** Sugari na sian portibi on hamu, haholongan ni portibi on do hamu songon halaknia. Tapi madung Hupili hamu sian portibi on, jana nada be halak portibi on hamu. Hara ni i do umbaen na hosom roha ni portibi on mida hamu. **20** Ingot hamu ma hata na Hudok on tu hamu, 'Nada gumodang naposo sian morana.' Muda diparkanciti halahi Au, hamu pe laing parkancitan ni halahi muse do. Muda diihutkon halahi pangajaranKi, laing ihutkonon ni halahi muse ma angka pangajaranmunu. **21** Baenon ni halahi ma sudena i tu hamu, hara ni na siseanKu hamu harana nada ditanda halahi sanga ise na marsuru Au. **22** Sugari sura na so jungada Au ro jana nada unjung Huhatahon sudena i tu halahi, nada tarsalahon halahi. Tapi anggo saonnari nada adong be sidalian ni halahi taringot tu dosa ni halahi. **23** Sanga ise na

mangkosomi Au, dihosomi ia muse do Damang. **24** Madung Hubaen di tonga-tonga ni halahi angka pangalaho na so jungada dibaen halak na asing sanga ise pe. Sugari na so Hubaen angka na songon i di tonga-tonga ni halahi, ias do halahi sian hasalaan. Saonnari haru pe madung diida halahi angka pangalaho i, hape laing hosom dope roha ni halahi tu Au dohot tu Damang. **25** Jadi madung songon i pangalahona anso laing tulus na tarsurat i di Buku Tona ni halahi na mandok, 'Dihosomi halahi do Au haru so binoto sanga hara ni aha.' **26** Jadi ro ma Pangurupi na sian Ama i, na giot suruonKu tu hamu, i ma Tondi ni hasintongan na ro sian Ama i. Ia do na manyaksihon taringot tu Au. **27** Tapi hamu pe angkon saksihononmunu do taringot tu Au, harana madung rap hamu dohot Au sian mulana."

**16:1** "Hupaboa pe i sudena tu hamu, anso ulang gabe mardandi do hamu. **2** Paruaron ni halahi ma hamu sian angka bagas paribadatan. Olo, na ro do hatihana, sanga ise na mamunu hamu, diambang ia na dung mangoloi Debata ma ia, hara ni na dung dibunu ia hamu. **3** Dibaen halahi pe songon i tu hamu, hara ni na so ditanda halahi dope Damang dohot Au. **4** Tapi madung Hupaboa hian i saonnari tu hamu anso diingot hamu i saulahon muda dung dibaen halahi tu hamu na songon i, madung Hupaboa hian do i tu hamu." "Anggo sian mulana nada pola Hupaboa hian i tu hamu, angke rap dope Au dohot hamu. **5** Tapi anggo saonnari, kehe noma Au mandapotkon na marsuru Au; hape haru songon i, umpe sahalak sian hamu na manyapai, 'Giot tu dia de Ho kehe?' **6** Mur hancit muse noma rohamunu dung Hupaboa na songon i tu hamu. **7** Torus torang ma Hupaboa tu hamu: Maruntungan do hamu muda kehe Au; harana anggo so kehe Au, nada tulus ro Pangurupi i tu hamu. Tapi muda kehe Au, suruhononKu ma Ia ro tu hamu. **8** Jana muda dung ro Ia, pabotohononNia ma tu portibi on arti ni dosa na satutuna, arti ni hatigoran dohot arti ni panguhuman. **9** PabotohononNia ma bahaso dosa do muda laing so porsaya halahi tu Au, **10** hara ni hatigoran jana hara ni na kehe Au mandapotkon Damang, jana nada idaonmunu be Au; **11** madung manguhumi Debata, dibaen madung hona uhum parkuaso ni portibi on! **12** Bahat dope nian na giot dokkononKu tu hamu, tapi anggo saonnari nada tuk dope gogomunu laho

manjagit i. **13** Tapi muda dung ro Tondi ni hasintongan i pabotohonNia ma hatutuan salaho tu Debata, Ia ma na manguluhon hamu laho mananda sude hatutuan. Nada dohononNia sanga aha sian roha-rohaNia sandiri; hum taringot tu na nibegeNia do hatahononNia. Jana paboanNia ma tu hamu sanga angka aha na giot masa tu pudian ni ari. **14** PasangaponNia ma Au, angke sanga aha na nipalaluNia tu hamu, sian Au do i dijagit Ia tu hamu. **15** Au do nampuna sasude na adong di Ama i. I do umbaen na Hudok, sanga aha na nipasahat ni Tondi i tu hamu, sian Au do i dijagit Ia." **16** "Hum santongkin nari noma, nada idaonmunu be Au, tapi santongkin nari muse, idaonmunu ma Au." **17** Dung i marsisapa-sapaan ma deba angka sisean ni Jesus i, ninna halahi ma, "Aha dehe astuan ni i sudena? Didok Ia, 'Santongkin nari noma nada idaonmunu be Au, jana santongkin nari idaonmunu ma Au.' Didok muse dope, 'Harana kehe ma Au mandapotkon Damang.' **18** Aha do maksudNia mandok 'Santongkin nari'? Nada binoto sanga taringot tu aha na nidokNia!" **19** Mangarti do Jesus na giot manyapai halahi tuSia. Jadi ning Ia ma tu halahi, "Hara ni na Hudok i, 'Hum santongkin nari noma nada idaonmunu be Au, tapi santongkin nari muse idaonmunu ma Au.' I dehe na giot sapaanmunu? **20** Hudok ma tu hamu: Satutuna martangisan ma hamu jana mangandungi; tapi jop ma roha ni portibi on. Susa ma rohamunu tapi gabe muba ma hasusaanmunu i gabe hajojop ni roha. **21** Muda giot sorang anak ni sada ina, marsak ma rohania hara ni na dung dapot hatihana manaon na hancit ia. Tapi disi sorang dakdanak i, manigor lupa ma ina i di na hancit i; marjop ni roha ma ia angke madung sorang sada dakdanak tu tano on. **22** Laing songon i ma hamu: Susa ma rohamunu saonnari, tapi marsuo dope Au dohot hamu, gabe jop ma rohamunu; jana nada tarbuat sanga ise hajopjop ni roha i sian hamu. **23** Anggo di ari i, nada sapaanmunu be sanga aha tu Au. Tutu do na Hudok on tu hamu; sanga aha na nipangidomunu sian Ama i markite-hite goarKu lehenon ni Damang ma i di hamu. **24** Lopus tu hatiha on na so unjung dope dipangido hamu sanga na aha markite-hite goarKu. Torus ma pangido hamu, gabe manjagit ma hamu, anso sanggam jop ni rohamunu." **25** "Markite-hite umpama do sudena i Hupatorang tu hamu. Tapi ro do hatihana, nada pola marumpama be Au muda mandok hata tu hamu. Torus

tangkas noma dokkononKu tu hamu taringot tu Ama i. **26** Anggo disi, pangidoonmunu ma tu Ama i markite-hite goarKu; jana nada Hudok na giot pangidoonKu tu Ama i di hamu, **27** harana Ama i sandiri pe holong do rohaNia tu hamu. Holong do rohaNia mida hamu, dibaen holong rohamunu tu Au, jana dihaporsayai hamu na sian Debata do Au ro. **28** Tutu do i na ro sian Ama i do Au, jana madung Hudapotkon portibi on. Tapi saonnari, tadingkononKu ma mangulahi portibi on, mulak ma Au tu Damang." **29** Dung i didok angka siseanNia i ma tu Jesus, "Saonnari madung marsitangkas Ho Tuhan mandok hata; nada be marumpama Ho. **30** Saonnari madung tangkas di hami, diboto Ho do sasudena; jana nada porlu be sapaan ni halak sanga na aha tu Ho. Jadi hara ni i, porsaya ma hami na sian Debata do haroroMu." **31** "Saonnari madung porsaya dehe hamu?" ninna Jesus tu halahi. **32** "Ligi hamu ma: Ro ma hatihana, jana tardok madung lalu i, paserahon ma hamu. Marmulahan be ma hamu tu bagasmunu jana tinggalkononmunu ma sada Au. Hape nada mamunjung Au, angke rap do Ama i dohot Au. **33** Hudok pe i sudena anso marhasonangan do hamu harana di bagasan Au do hamu. Marhancit ma hamu baenon ni portibi on. Tapi sobar ma hamu! Madung Hutraluhon portibi on!"

**17:1** Dung sidung didok Ia songon i, manatap ma Jesus tu langit, ning Ia ma, "O ale Amang, saonnari madung dapot hatihana. Pasangap ma AnakMu anso dipasangap AnakMi muse Ho Amang. **2** Madung dilehen Damang tu Anak i kuaso mangarajai sude jolma manusia anso dilehen Anak i hangoluan na so mantak tu sudena halak na nipasahat ni Damang tuSia. **3** On ma hangoluan na so mantak; anso ditanda halak Ama i, sasada Ia do Debata na tutu, jana mananda Jesus Kristus na nisuruhon ni Ama i. **4** Madung Hupasangap Ama i di ginjang tano on; jana madung Hupasadung karejo na nisuru ni Ama i karejohononKu. **5** Amang! Pasangap ma Au saonnari markite-hite hasangapan na Hujagit rap dohot Ho dampak so dijadihon dope portibi on. **6** Madung Hupatorang Ho Amang tu angka jolma na sian portibi on, i ma na dung nipasahatMu tu Au. Ho do Amang nampuna halahi; jana madung dipasahat Ho halahi tu Au. Madung

diihutkon halahi hata na nilehenMi. **7** Jana saonnari madung diboto halahi, sudena na nilehenMi tu Au, laing Damang do nampuna i. **8** Madung Hupalalu tu halahi barita na nilehen ni Damang i tu Au; jana madung dijagit halahi i. Madung tangkas sajo di halahi, Damang do na marsuru Au. **9** Hara ni halahi do umbaen na martangiang Au. Nada Hutangiangkon anggo portibi on; hum tu angka jolma na nipasahat ni Damang i tu Au do na Hutangiangkon; harana Damang do nampuna halahi. **10** Sude na adong di Au laing Damang do nampuna i; jana sude sinadongan ni Damang laing Au do nampuna i. Markite-hite halahi do Au dipasangap. **11** Saonnari ro ma Au mandapotkon Damang. Nada be di portibi on Au; tapi anggo halahi laing di portibi on dope. Ale Amang na badia! Jagohon ma halahi dohot kuasoMi -- i ma kuaso na nilehen ni Damang i tu Au \*JAGOHON MA HALAHI ... DAMANG TU AU: Dipiga-piga-piga naskah narobi didok: Marhite kuaso ni goar ni Damang, jago ma halahi na dung dilehen ni Damang tu Au.\* -- anso gabe sada halahi songon Damang na sada dohot Au. **12** Salolot rap Au dohot halahi di portibi on, madung Hujagohon halahi markite-hite kuaso ni Damang i -- i ma kuaso na nilehen ni Damang i tu Au. Madung Huondingi halahi na nipasahat ni Damang tu Au, jana umpe sada sian halahi na mago, asing ni anak mago i; anso laing tulus ma na tarsurat di Buku Na Badia i. **13** Saonnari ro ma Au mandapotkon Damang. Jadi taran di portibi on Au, Hubaritahon angka na songon i; anso tarkilala situtu hajojop ni rohangKu di bagasan roha ni halahi. **14** Madung Hupalalu tu halahi pangajaran ni Damang jana dihosom portibi on do halahi, angke nada portibi on nampuna halahi; laing sarupa ma i tu Au na so nampuna ni portibi on. **15** Nada Hupangido anso diparuar Damang halahi sian portibi on tapi on do na Hupangido, anso dijagohon Damang halahi maradopkon si Jahat i. **16** Nada portibi on nampuna Au, laing songon i dohot halahi; nada portibi on nampuna halahi. **17** Markite-hite hasintongan ni Damang, baen ma halahi gabe angka jolma hapunjungan ni Damang sandiri; hata na nidok ni Damang i do hasintongan i. **18** Madung disuru Damang Au tu portibi on, laing songon i muse madung Husuru halahi tu portibi on. **19** Hupasahat do diringKu tu Damang laho humopkop halahi, anso halahi pe gabe nampuna ni Damang di bagasan hasintongan.

**20** Nada hum hara ni halahi sajo umbaen na martangiang Au. Laing Hutangiangkon muse do angka halak na giot porsaya tu Au hara ni hasaksian ni halahi on. **21** Hupangido tu Damang anso gabe sada halahi sude, songon Damang na sada dohot Au jana Au sada muse dohot Damang. Sai sada ma nian halahi dohot Hita anso porsaya portibi on na nisuru ni Damang do Au. **22** Madung Hupasangap halahi mardongan hasangapan na nilehen ni Damang i di Au, anso gabe sada halahi hara ni i, laing songon parsada ni Damang dohot Au; **23** sada Au dohot halahi jana sada Damang dohot Au; anso sada situtu halahi jana hara ni i botoon ni portibi on ma Damang do marsuru Au jana dihaholongi Damang do halahi songon panghaholongi ni Damang tu Au. **24** Madung dipasahat Damang halahi tu Au. Saonnari Hupangidohon ma tu Damang anso rap dohot Au halahi sanga di dia pe Au maringanan, anso diida halahi hasangapanKi, i ma hasangapan ni Damang na nilehenMi tu Au, angke na holong do roha ni Damang tu Au mamungka sian dompak so dijadihon dope portibi on. **25** Ale Amang na tigor roha! Nada ditanda portibi on Ho, tapi anggo Au Hutanda do Damang, jana halak on pe diboto halahi do, Damang do na marsuru Au. **26** Madung Hupabotohon Damang tu halahi; jana sai pupuonKu do mambaen songon i, anso laing dihilala halahi muse holong ni roha ni Damang tu Au jana Au pe sada ma dohot halahi."

**18:1** Jadi dung sidung didok Jesus songon i, kehe ma Ia rap dohot angka siseanNia i tu ipar ni Batang aek Kidron. Adong do disi sada kobun, jana masuk ma Jesus tu kobun i dohot angka siseanNia i. **2** Diboto si Judas panjehe i do inganan i; dibaen madung jotjot Jesus marlagut disi rap dohot angka siseanNia i. **3** Dung i ro ma si Judas tu inganan i, dioban ia ma saparangan tentara dohot angka panjago ni Bagas Ni Debata na nisuru ni angka sintua ni malim dohot halak Parise. Maroban sinjata do halahi, lampu dohot sulu. **4** Madung diboto Jesus hian sanga aha na giot masa tuSia. Dung i didapotkon Jesus ma angka jolma na ro i, ning Ia ma, "Ise dehe na nijalahanmunu?" **5** Dialusi halahi ma, "Jesus halak Nasaret i." "Au do i," ninna Jesus tu halahi. Laing disi do jongjong si Judas panjehe i rap dohot halahi. **6** Di na nidok ni Jesus tu halahi, "Au do i," sumurut ma

halahi sude gabe martinggangan tu tano i. **7** Dung i disapai Jesus ma halahi sanoli nari, "Ise na nijalahanmunu?" ning Ia. "Jesus halak Nasaret i," ning halahi mangalusi. **8** Didok Jesus ma, "Madung Hudok Au do i. Jadi muda Au do na nijalahanmunu, padiar hamu ma anggo songon i kehe na asing on." **9** (Di na nidokNia songon i, tulus ma tarjadi na nidokNia hian;songon on, "Ale Amang, sian sude na nipasahat ni Damang i tu Au, umpe sahalak na gabe mago.") **10** Jadi ro ma si Simon Petrus na maniop podang hatiha i, disintak ia ma podangnia i ditampul ia ma naposo ni Malim Godang i, lopus ramping pinggol siamunna i. Si Malkus do goar ni bayo i. **11** Didok Jesus ma tu si Petrus, "Sarungkon ma podangmi, nada he angkon inumonKu do panginuman parkancitan na nilehen ni Damang i tu Au?" **12** Dung i ro ma angka parajurit i dohot komandanna i songon i dohot angka Jahudi panjago i, ditangkup halahi ma Jesus jana ditambah. **13** Jadi dioban halahi ma Ia parjolo tu si Hanas, i ma tulang ni si Kayafas. Si Kayafas, i ma Malim Godang di na sataon i. **14** Jana ia do paingotkon halak Jahudi i, na dumenggan do mate sada halak manghopkop rayat sudena, ulang pado masarsar sude bangso i. **15** Diihutkon si Simon Petrus rap dohot sada halak sisean na sada nari ma Jesus. Ditanda Malim Godang i do anggo sisean na sada nari i; jadi diihutkon ia ma Jesus masuk tu alaman ni bagas ni Malim Godang i, **16** tapi anggo si Petrus diruar do ia paintehon di pintu i. Dung i haruar ma sisean na sada nari i, i ma na nitanda ni Malim Godang i, mangkatai ma ia dohot naposo dadaboru na manjago di pintu i, lalu dioban ia ma si Petrus masuk tu bagasan. **17** Didok naposo dadaboru sijago pintu i ma tu si Petrus, "Nada he dohot ho sahalak sian angka sisean ni Bayo i?" "Nada," ning si Petrus. **18** Ngali do ari hatiha i, jadi dipagara angka naposo i ma dohot angka panjago i api, marsisudu ma halahi humaliang api i. Laing dohot do si Petrus disi marsisudu rap dohot halahi humaliang api i. **19** Disapai Malim Godang i ma Jesus taringot tu angka siseanNia i dohot taringot tu pangajaranNia. **20** Ninna Jesus ma mangalusi, "Tangkas do Au mandok hata di jolo ni halak na bahat. Sai mangajari do Au di angka bagas paribadatan dohot di Bagas Ni Debata di inganan ni halak Jahudi na somal marlagut. Nada unjung Hudokkon sanga aha di na buni. **21** Biasi disapai tuan i Au? Tu halak na dung umbege Au



mangajari ma sapai hamu. Sapai ma halahi sanga aha na Hudok tu halahi -- diboto halahi do i." **22** Dung didokkon Jesus songon i, ro ma sada halak panjago i manampeleng Ia didok ma tuSia, "Na puluk ma Ho mangkatai songon i tu Malim Godang i!" **23** Dialusi Jesus ma, "Muda adong Hudokkon na sala, paboa ma jolo antong dison sanga aha hasalaanKi! Tapi muda tutu do na Hudokkon i, biasi manampelengi ho tu Au?" **24** Dung i disuru si Hanas ma dioban Jesus tu Malim Godang Kayafas laing tartambat. **25** Anggo si Petrus laing disi dope ia jongjong marsisudu. Didokkon halak ma tusia, "Nada he laing dohot ho sahalak sian angka sisean ni bayo i?" Tapi diporso si Petrus ma. Didok ia, "Nada le!" **26** Sahalak sian angka naposo ni Malim Godang i, i ma sisolkot ni bayo na hona tampul ni si Petrus pinggolna i, mandok tu si Petrus, "Nada he ho na huida i di kobun i rap dohot Ia?" **27** Dung i didok si Petrus ma mangulahi, "Nada," -- jana manigor martahuak ma manuk disi. **28** Dung i dioban halahi ma Jesus sian bagas ni si Kayafas tu inganan ni gubernur. Manyogot dope hatiha i. Anggo halak Jahudi i sandiri nada pola masuk tu bagasan inganan i, anso ulang gabe ramun halahi mangihutkon ugamo, hara ni na giot dohot halahi mangankon sipanganon Paskah. **29** Jadi si Latus do haruar mandapotkon halahi laho manyapai, "Aha do pangaduanmunu taringot tu bayo on?" ning ia. **30** Dialusi halahi ma, "Nada pola hami oban Ia tu Gubernur i anggo hara ni na so marsala." **31** Didok si Latus ma tu halahi, "Hamu ma mamaresoSa dohot mamutuskon uhuman mangihutkon tona ni ugamomunu sandiri!" Tapi dialusi halak Jahudi i ma, "Nada tola bunuonmami sanga ise." **32** (Tarjadi pe songon on anso tulus do hata na nidok ni Jesustaringot tu pangalaho ni parmataNia.) **33** Masuk ma si Latus mangulahi tu bagasan mamiohon Jesus. Dung i disapai ia ma Jesus ning ia ma, "Adong he Raja Ni halak Jahudi Ho?" **34** Dialusi Jesus ma, "Sapa-sapamu sandiri dehe i sanga adong halak na asing paboahon tu ho taringot tu Au?" **35** Dialusi si Latus ma, "Halak Jahudi dehe au lakna? BangsoMi sandiri dohot angka sintua ni malim i do na pasahatkon Ho tu au. Aha do lakna na nibaenMu?" **36** Ninna Jesus ma mangalusi, "Anggo HarajaanKu nada harajaan portibi on. Sugari na sian portibi on HarajaanKi, aloon ni angka halakKu ma anso ulang jabat nipasahat Au tu halak Jahudi. Tapi

nada sian portibi on anggo HarajaanKu!" **37** Dung i marsapa ma si Latus tuSia, "Antong anggo songon i, tutu do Ho raja?" Dialusi Jesus ma, "Tutu do Au raja, songon na nidokmi. Sorang pe Au jana ro tu portibi on hum na sada on sajo do maksudna, i ma laho manyaksihon hasintongan. Jana sanga ise na marasal sian hasintongan i dijagit ia do Au." **38** Disapai si Latus ma Ia, "Aha dehe arti ni hasintongan?" Dung i marlojong ma si Latus kehe tu ruar mandapotkon halak Jahudi i, didok ia ma tu halahi, "Sada pe nada adong dapot au hasalaanNia. **39** Tapi mangihutkon na somal, sai hupalua do sada halak na tarhurung ganop Pesta Paskah. Ra do hamu muda hupalua di hamu Raja Ni halak Jahudi on?" **40** Dialusi halahi ma marsurak-surak, "Nada! Indangkon sai palua i! Si Barabbas ma palua!" Panyamun do si Barabbas on.

**19:1** Dung i ditogu si Latus ma Jesus, jana diloncingi ma Ia. **2** Dibaen angka tentara na disi i ma sada tuku sian angka ranting na marduri-duri. Dipamasuk halahi ma tuku i tu ginjang ni ulu ni Jesus. Dung i dipamasuk halahi ma baju juba na ungu tuSia, **3** lalu marroan ma halahi tu joloNia ninna halahi ma, "Horas ma di Raja i, Raja Ni halak Jahudi!" Dung i ditampeleng halahi ma Ia. **4** Dung i haruar ma si Latus sanoli nari, didok ia ma tu halak na bahat i, "Ligi hamu ma! Madung huoban Ia saonnari tu ruar anso diboto hamu na so adong dapot au hasalaanNia bagi aha pe." **5** Dung i haruar ma Jesus mamake tuku duri dohot baju juba na ungu i. Didok si Latus ma tu halahi, "Ligi hamu ma halak on!" **6** Dung diida angka kapala ni malim dohot angka panjago i Jesus, marsurak ma halahi, "Parsilangkon i! Parsilangkon i!" ning halahi. Ninna si Latus ma mandok halahi, "Hamu ma mambuat dohot mamparsilangkonsa. Anggo au nada adong dapot au bagi na aha salaNia." **7** Dialusi halak Jahudi i ma, "Mangihutkon tona na adong di hami simatehononkon do i, angke dioku Ia diriNia Anak Ni Debata." **8** Jadi dung dibege si Latus songon i pandok ni halahi, mur mabiar ma ia. **9** Masuk ma ia mangulahi tu bagasan inganan i, disapai ia ma tu Jesus, "Sian dia dehe asalMu?" Tapi nada dialusi Jesus bagi aha. **10** Jadi didok si Latus ma manyapai Ia, "Na so ra do Ho mangalusi au? Na so diboto Ho do lakna na markuaso do au paluahon Ho sanga

mamparsilangkon Ho?" **11** Dialusi Jesus ma, "Anggo na so dilehen Debata do kuaso di ho, nada adong kuasomu tu Au. Hara ni i gumodang do dosa ni na pasahatkon Au tu ho ulang pado ho." **12** Dung dibege si Latus na songon i mur diakalkon ia ma palua Jesus. Tapi marsurak-surak ma halak Jahudi i, "Muda dipalua tuan i do i, na so dongan ni Kesar do tuan i! Sanga ise na mandok diriNa raja, alo ni Kesar do i!" **13** Disi dibege si Latus angka pandohan i, dioban ia ma Jesus tu ruar jana juguk ma ia di juguhan paruhuman di inganan na margoar Litostrotos (astuanna: pantar batu; di hata Ibrani digoari do i Gabbata). **14** Hira-hira pukul dua bolas ma hatiha i, jana andospotangna i mamungka ma etongon Ari Sabat. Didok si Latus ma tu halak Jahudi i, "Na ma, indon rajamunu on!" **15** Marsurak-surak ma halahi, ninna halahi, "Bunu ma i! Bunu ma! Parsilangkon i!" Dung i ninna si Latus ma mandok tu halahi, "Parsilangkononku ma he Rajamunu?" Dialusi angka kapala ni malim i ma, "Hum sasada Kesar i do rajanami!" **16** Dung i dipasahat si Latus ma Jesus tu halahi anso dipakuhon tu hayu parsilang i. Dijagit halahi ma Jesus jana dioban halahi. **17** Kehe ma Jesus, diporsan Ia sandiri ma hayu parsilangNia tu inganan na margoar "Partangkurahan". (Di saro Ibrani didok Golgota.) **18** Dipakuhon ma Ia disu tu hayu parsilang i. Diparsilangkon muse do dua halak nari na asing rap dohot Ia, sahalak di siambirang, sahalak nari di siamunNia, di tonga-tonga ma Jesus. **19** Di hayu parsilang ni Jesus, disuru si Latus ma dibaen surat songon on, "Jesus na sian Nasaret Raja Ni halak Jahudi." **20** Bahat ma halak na manyise suratna i, harana nada pola sadia dao inganan i sian kota. Disuratkon di hata Ibrani, hata Latin dohot hata Junani do dibaen suratna i. **21** Didok angka sintua ni malim ni halak Jahudi i ma tu si Latus, "Ulang ma suratkon 'Raja Ni halak Jahudi,' songon on ma suratkon disu, 'Didok Bayo on, Au do Raja Ni halak Jahudi.'" **22** Tapi ninna si Latus ma mangalusi, "Nada uba-ubaon be sanga aha na dung husuratkon i!" **23** Dung diparsilangkon angka tentara i Jesus, dibuat halahi ma pakeanNa i. Dibagi opat halahi ma i, sabagian be ma sada halak. Dibuat halahi muse ma baju jubaNia i. Nada adong panjaitan ni baju jubaNia i -- na ditonun do i sian ginjang lalu tu toru. **24** Dung i didok angka tentara i ma sama halahi, "Ulang pola tabagi anggo on. Taundi ma manontuhon

sanga ise na mandapot on." Anso laing tulus ma tarjadi na tarsurat di Buku Na Badia i na mandok songon on, "Dibagi-bagi halahi ma pakeanKu. Jana diundi halahi ma laho manontuhon bajungKu." I ma na dung nipatulus ni angka tentara i. **25** Jongjong ma di lambung ni parsilang ni Jesus i, inangNia, bujingNia, si Maria dadaboru ni si Klopas dohot si Maria Magdalena. **26** Diligi Ia ma tu inangNia dohot sisean na nihaholongan ni Jesus na jongjong disi. Dung i didok Jesus ma tu inangNia i, "Ligi ma inang, anakmu do indon." **27** Dung i didok Jesus ma tu siseanNia i, "Ligi ma, inangmu do indon!" Mamungka sian i dioban sisean i ma inang ni Jesus tinggal di bagasnia sandiri. **28** Dung i diboto Jesus ma na dung sidung sasudena; jadi songon na tarsurat di Buku Na Badia i angkon laing tulus do i, gabe didok Ia ma, "Manguas Au." **29** Adong disi sada mangkuk na bubung marisi anggur na mancom. Dironjomkon halahi ma lumut tu bagasan anggur i dibaen halahi ma tu ujung ni bulu. Dung i didaiskon halahi ma lumut i tu pamangan ni Jesus. **30** Diincop Jesus ma anggur i, dung i ning Ia ma, "Madung marujung!" Jadi dipaunduk Ia ma uluNia, tos ma hosaNia. **31** Ari Jumahat do hatiha i, i ma ari parhobasan tu Ari Pesta Paskah i. Nada tola di halak Jahudi laing gantung bangke ni halak na niparsilangkon di hayu parsilang di Ari Sabat. Tarlobi Ari Sabat na gumodang do Ari Sabat on. Jadi hara ni i dipangido halak Jahudi i ma tu si Latus anso niponggol holi-holi ni pat ni angka na diparsilangkon i anso nipaijur bangke ni halahi sian hayu parsilang i. **32** Jadi kehe ma angka tentara i mamonggoli pat ni na parjolo i, dung i pat ni na sada nari na niparsilangkon rap dohot Jesus. **33** Tapi dung lalu halahi tu lambung ni Jesus, diida halahi ma, hape ma mate Jesus. Jadi nada pola diponggol halahi be patNa i. **34** Tapi ro ma sada tentara i, disusukkon ia ma hujur tu rusuk ni Jesus; manigor haruar ma mudar na marcampur aek sian rusukNa i. **35** Na marnida i sandiri do mamaritahon na masa on, anso laing porsaya \*LAING PORSAYA: Dipiga-piga-piga naskah narobi didok: Tongtong porsaya.\* hamu. Jana tutu do songon on na nidoknia i; tangkas do diboto ia songon i. **36** Umbaen na songon i pe i, anso laing tulus do tarjadi na tarsurat di Buku Na Badia i, i ma, "Umpe sada sian holi-holiNa i na niponggol." **37** Di Buku Na Badia i pe laing tarsurat do songon on,

"Tatapon ni halak ma Ia, na nihujur ni halahi i." **38** Dung i ro ma si Josep halak Arimatea mangido isin tu si Latus laho mambuat bangke ni Jesus. (Na dung gabe sisean ni Jesus do si Josep on di na buni, harana laing mabiar dope ia mida angka parkuaso ni halak Jahudi i.) Dilehen si Latus ma tusia isin, jadi kehe ma ia mambuat bangke i. **39** Dohot do si Nikodemus, i ma na ro borngin-borngin nabaruon mandapotkon Jesus, rap dohot si Josep. Dioban si Nikodemus ma angka ramu-ramuan mur dohot aloe marborat-borat tolu pulu kilo. **40** Dibuat halahi na dua ma bangke ni Jesus, dibaen halahi ma kopenna dohot angka ramu-ramuan i songon na nihasomalkon ni halak Jahudi laho mananom na mate. **41** Adong do di lambung inganan ni hayu panyilangan ni Jesus i sada kobun. Adong do sada kuburan na imbaru na so jungada dope marpake gabe pananoman ni halak. **42** Gabe tusi ma dipamasuk halahi bangke ni Jesus hara ni na giot dapot ma Ari Sabat, boti hara ni donokna.

**20:1** Andostorang ni Ari Mingguna i kehe ma si Maria Magdalena tu kuburan i. Diida ia ma madung digulang batu panutup ni tanoman i sian baba ni kuburan i. **2** Dung i marlojong ma ia manjalahi si Simon Petrus dohot sisean na asing haholongan ni Jesus i, didok ia ma tu halahi, "Madung dibuat halak bangke ni Jesus; nada hami boto sanga di dia dipayakkon bangkeNa i!" **3** Torus ma kehe si Petrus dohot sisean na sada nari tu kuburan. **4** Rap marlojong ma halahi na dua, tapi humipas do marlojong sisean na sada nari i sian si Petrus; gabe parjolo ma ia lalu tu kuburan i. **5** Dung diligi ia tu bagasan kuburan i; diida ia ma angka kopenna i disi tapi nada pola masuk ia tu bagasan. **6** Didapoti si Petrus ma sisean i sian pudi, jana torus masuk ma ia tu bagasan kuburan i. Diida ia ma payak disi angka kopen i, **7** tapi anggo abit na nilitkon i tu ulu ni Jesus nada pungu disi. Asing do i marlompit. **8** Jadi ro ma sisean na sada nari, na parjolo lalu i, masuk ma ia muse. Laing diida ia do i sudena jana dihaporsayai ia. **9** (Lopus tu hatiha i laing na so diastui halahi dope natarsurat di Buku Na Badia i, na angkon mulak mangolu Ia mangulahi sian hamatean.) **10** Dung i mulak ma sisean ni Jesus i. **11** Laing tangis-tangis ma si Maria di jolo ni kuburan i. Di na tangis ia ditailihon ia ma tu

bagasan kuburan i, **12** jadi diida ia ma disi dua halak surusuruan marbaju na bontar. Di lambung hapayahan ni bangke ni Jesus i ma surusuruan na dua i juguk. Sahalak juguk sabola uluNa i, sahalak nari juguk sabola patNa i. **13** Disapai surusuruan i ma tu si Maria, "Biasi tangis ho inang?" ninna halahi. Dialusi si Maria ma, "Madung dibuat halak Tuhanku hape nada huboto sanga na tu dia dibaen halahi." **14** Dung didok si Maria songon i, manaili ma ia adop pudi, diida ia ma Jesus jongjong disi. Tapi nada diboto ia, hape Jesus do i. **15** Disapai Jesus ma tusia, "Biasi tangis ho inang? Ise na nijalahanmu?" Ning roha ni si Maria, panjago ni kobun i do i. Jadi didok si Maria ma, "Muda hamu do amang paimbarkon sian on, paboa ma jolo tu au sanga di dia dibaen ho Ia. Au pe mambuatsa annon." **16** Ninna Jesus ma tu si Maria, "Maria!" Dung i manaili ma si Maria tu Jesus jana didok ia ma di hata Ibrani, "Rabbuni!" (astuanna "Guru"). **17** Didok Jesus ma tu si Maria, "Ulang jama Au jolo, harana nada podo manaek Au tu Damang. Kehe ma ho mandapotkon angka kahanggingKu jana paboa ma tu halahi, 'Manaek ma Au tu Damang, i ma Amangmunu muse; tu DebatangKu, i ma Debatamunu muse.'" **18** Dung i kehe ma si Maria paboahonsa tu angka sisean ni Jesus, bahaso na dung diida ia Tuhan i jana Tuhan i do mandok tusia sudena i. **19** Laing di Ari Minggu i dung borngin marlagut ma anak sisean ni Jesus di sada bagas. Digoruk halahi ma sude pintu ni bagas i; hara ni na mabiar halahi tu angka parkuaso ni halak Jahudi. Jadi tompu ma ro Jesus jongjong di tonga-tonga ni halahi, ning Ia ma, "Hasonangan ma di hamu!" **20** Dung didokkon Ia songon i dipatuduhon Ia ma tangan dohot rusukNia tu halahi. Jadi moga sajo ma halahi dung diida halahi Tuhan i. **21** Dung i didok Jesus ma tu halahi sanoli nari, "Hasonangan ma di hamu! Songon parsuru ni Damang di Au, laing songon i ma hamu Husuru." **22** Dung didok Ia songon i mangombus ma Ia tu halahi jana ning Ia ma, "Jagit hamu ma Tondi Parbadia. **23** Muda disesa hamu dosa ni sanga ise, laing tarsesa ma dosana i; muda nada disesa hamu dosa ni halak, laing na so tarsesa ma dosana i." **24** Si Tomas (na nigoaran muse si Linduat) i ma sahalak sian sisean ni Jesus na dua bolas halak i. Jadi hatiha na ro i Jesus, nada dohot si Tomas rap dohot sisean ni Jesus na asing i. **25** Jadi dipaboa angka sisean ni Jesus na asing i ma tu si Tomas, ninna halahi ma, "Madung

hami ida Tuhan i!" Tapi dialusi si Tomas ma, "Anggo so jolo huida pamakuan na di tanganNa i jana hudaiskon jari-jaringkon tu pamakuan i, jana anggo so jolo hubaen tangankon tu rusukNa i, nada porsaya dope au."

**26** Dung salapan ari, marlagut ma mangulahi angka sisean ni Jesus di bagas i, dohot ma si Tomas disi. Margoruk do sude pintu ni bagas i. Tapi ro ma Jesus jongjong di tonga-tonga ni halahi, ning Ia ma, "Hasonangan ma di hamu!" **27** Dung i didok Jesus ma tu si Tomas, "Baen tuson jari-jarimi, ligi ma tanganKon. Surduhon ma tanganmi tu rusukKon. Ulang be ganggu rohamu. Porsaya ma ho!" **28** Dung i ninna si Tomas ma tu Jesus, "O Tuhanku! Debatangku!" **29** Jadi didok Jesus ma tusia, "Hara ni na dung niidami dehe Au umbaen na porsaya ho? Martua ma sanga ise na porsaya tu Au haru so diidasa pe Au!" **30** Laing bahat dope angka hahomangan na nibaen ni Jesus di jolo ni angka siseanNia i, tapi nada pola disuratkon anggo angka hahomangan i di bagasan buku on. **31** Umbaen na nisurat pe sudena na tarsurat di bagasan buku on, anso porsaya do hamu bahaso Jesus do Kristus i, i ma Anak Ni Debata; jana anso dapotan hangoluan hamu markite-hite haporsayaan di goarNia.

**21:1** Dung i dipatidahon Jesus ma diriNia sanoli nari tu angka siseanNia i di Dano Tiberias. Songon on ma baritana di na nipatidahonNia diriNia: **2** Lagut ma hatiha i si Simon Petrus dohot si Tomas na nigoaran muse si Linduat, dohot si Natanael halak Kana na di Galilea, songon i muse angka anak ni si Zebedeus rap dohot dua halak nari sisean ni Jesus na asing. **3** Jadi didok si Simon Petrus ma tu halahi, "Kehe ma jolo au manjala!" "Dohot ma hami," ninna donganna na asing i tusia. Jadi kehe ma halahi manigor marparau. Hape umpe sangkibung ihan dapot halahi na saborngin i. **4** Jadi dung bincar mataniari, ro ma Jesus, jongjong ma Ia di topi ni dano i; tapi nada diboto halahi dope, bahaso Jesus do i. **5** Didok Jesus ma tu halahi, "Adong dehe ihan di hamu, dakdanak?" ning Ia. "Inda," ninna halahi. **6** Didok Jesus ma tu halahi, "Sampakkon hamu ma jala i tu siamun ni parau i, dapotan ihan ma hamu annon." Dung i disampakkon halahi ma jala ni halahi tu dano i, hape nada tarsarat halahi be mangulahi hara ni bahat ni ihan di bagasan. **7** Didok sisean haholongan ni Jesus i ma tu si

Petrus, "Tuhan i do i!" ning ia. Jadi dung dibege si Petrus didok bayo i, "Tuhan i do i," manigor dipake ia ma abitnia mangulahi (harana madung sanga buka baju ia) mangambur ma ia tu aek i. **8** Anggo na asing i marparau ma halahi mandapoti tu darat, hara ni na manyarat jala na marisi ihan na gok i. Nada pola sadia dao halahi sian darat, tar hira-hira saratus meter do. **9** Dung mijur halahi sian parau i, diida halahi ma adong disi banggar na gara dohot ihan na nipanggang di ginjangna i; adong muse do roti disi. **10** Didok Jesus ma tu halahi, "Oban hamu tuson deba ihan na baru dapotmunu i." **11** Kehe ma si Simon Petrus tu parau i, manyarat jalannia tu darat. Gok jala i dohot ihan na godang-godang; saratus lima pulu tolu sudena. Haru pe songon i bahat ni ihan i, nada pola jabat masibak jala i. **12** Dung i didok Jesus ma tu halahi, "Mangan ma hita jolo!" Tapi nada adong sian angka siseanNia i na puluk manyapai, mandok, "Ise do hamu Amang?" Harana sude do halahi mamboto, Tuhan i do i. **13** Dung i dipadonok Jesus ma tu halahi, dibuat Ia ma roti i, lalu dilehen Ia ma tu halahi. Laing songon i ma dibaen Ia ihan i. **14** On ma patolu-nolihon dipatidahon Jesus diriNia tu angka siseanNia i dung mulak mangolu Ia sian na mate. **15** Dung mangan halahi, didok Jesus ma tu si Simon Petrus, "O Simon, anak ni si Jona, humolong dehe rohamu mida Au, ulang halahon?" ning Ia. Dialusi si Petrus ma, "Olo Tuhan. Diboto Ho do Tuhan holong ni rohangku tu Ho." Didok Jesus ma tusia, "Antong parmahani ma angka biri-biringKu." **16** Didok Jesus ma tusia padua-nolihon, "O Simon anak ni si Jona! Holong do rohamu mida Au?" ning Ia. Dialusi si Petrus ma, "Olo Tuhan. Diboto Ho do holong ni rohangku tu Ho." Didok Jesus ma tusia, "Antong parmahani ma biri-biringKu!" **17** Patolu-nolihon laing disapai Jesus dope tusia, "O Simon anak ni si Jona. Holong do rohamu mida Au?" ning Ia. Gabe marsak ma si Petrus hara ni na nisapaan ni Jesus i ia jabat tolu noli di na nidok ni Jesus, "Holong dehe rohamu mida Au?" Tapi laing dialusi si Petrus ma, "O Tuhan diboto Ho do Tuhan sasudena. Diboto Ho do Tuhan na holong rohangku mida Ho!" Dung i didok Jesus ma tusia, "Antong parmahani ma angka biri-biringKi. **18** Tutu do na Hudok on tu ho: Anggo dompak poso ho, dihobasi ho do dirimu jana mardalani ma ho sanga tu dia pe giotmu. Tapi muda dung matobang ho saulahon,



surduhononmu ma tanganmu, jana halak na asing noma manghobasi ho jana maroban ho tu inganan na so giot ni rohamu." **19** (Jadi na paboahon sanga na tarbia do parmata ni si Petrussaulahon laho pasangap Debata, i do na nidok ni Jesus disi.) Dung i didok Jesus ma tu si Petrus, "Ihutkon ma Au!" ning Ia. **20** Di na manaili si Petrus, diida ia ma sisean haholongan ni Jesus i di pudinia. (I ma na juguk di lambung ni Jesus hatiha na mangan borngin-borngin i, na manyapai tu Jesus, "O Tuhan, ise dehe na giot manghianat i tu Ho?") **21** Dung diida si Petrus ia, didok ia ma tu Jesus, "Bia ma halak on saulahon Tuhan?" ning ia. **22** Ninna Jesus ma mangalusi, "Muda jop rohangKu laing mangolu ia lopus ro Au mangulahi, ahana ma i di ho. Salaku ihutkon ma Au!" ninna Jesus. **23** Jadi sar ma hobar di tonga-tonga ni angka sisean ni Jesus paboa na so mate sisean na sada i. Hape nian nada adong didok Jesus, na so mate ia; anggo na nidok ni Jesus songon on do, "Muda jop rohangKu laing mangolu ia lopus ro Au, aha na ma i di ho!" ning Ia do. **24** Jadi sisean on ma na mangalehen hasaksian taringot tu angka na masa on. Laing ia muse do na manyuratkon on. Jana taboto do bahaso na tutu na nidoknia i. **25** Bahat dope nian angka pambaenan ni Jesus. Sugari nisuratkon i sudena pasada-sada, ning rohangku na satano on pe nada tuk inganan ni angka buku sisuraton.